

## MAK

*Jon yansnjro qaji a anjam palontoqnej*

<sup>1</sup> Qotei aqa Niri Yesus Kristus aqa anjam bole e utruq na saqai.

<sup>2</sup> Nami Qotei na aqa Niri Yesus endegsi minjej, “Ni que. E na ijo anjam maro tamo qarinyitqa a ni qa namoosim ino gam gereiyetmqas.

<sup>3</sup> A wadau sawaq di tulaq leleñoqnsim tamo ungasari naŋgi endegsi minjroqnaqas, ‘Tamo Koba a bqajqa gam gereiyetyi. Aqa gam tingitetiy.’” Qotei a nami aqa Niri degsi minjej. Onaqa aqa medabu o qaji tamo Aisaia a anjam di neŋgrenyonaq soqnej.

<sup>4-5</sup> Bunuqna Jon yansnjro qaji a wadau sawaq di brantej. Brantosiq dia tamo ungasari naŋgi Qotei aqa anjam palontosiq minjroqnej. Tamo ungasari Judia sawaq di soqneb qaji naŋgi ti Jerusalem qureq di soqneb qaji naŋgi ti kalil Jon aqa areq gileqnabqa a na naŋgi endegsi minjroqnej, “Ninji are bulyibqa Qotei na nunjo une kalil kobotetŋwas. Amqa e na niŋgi yansŋgwai.” Degsi minjreqnaqa naŋgi na nango une kalil babteqna abqa Jordan yaq di yansnjroqnej.

<sup>6</sup> Jon a wadau sawaq di soqnej di a ingi ingi saiqoji. Deqa a gara jugo kamel aqa jun̄gum na gereiyo qaji di jugoqnsiqa alalag na siŋgilatosiq laqnej. A ingi uyo saiqoji deqa a sis ti bisim qaq ti uyoqnej.

<sup>7</sup> A Qotei aqa anjam palontoqnsiqa tamo ungasari naŋgi endegsi minjroqnej, “Tamo Koba a bunuqna ijo qoreq na bqas. A tamo siŋgila

koba. Ijo siŋgila aqa siŋgila ti keresai. Deqa e a kaŋgalyqajqa e tamo bolesai.

<sup>8</sup> E ya na niŋgi yansŋeqnum. Ariya Tamo Koba a bosimqa Mondor Bole aqa siŋgila na niŋgi yansŋgwas.” Jon na tamo uŋgasari naŋgi anjam degsi minjroqnej.

### *Jon na Yesus yansej*

<sup>9</sup> Bati bei Yesus a Jon na yansqa marsiqqa Nasaret qureq dena tigelosiqa Galili sawa uratosiq Jon aqa areq bej. Bonaqa Jon na Jordan yaq di yansej.

<sup>10</sup> Yansonqa a yaq na tigelosiqa tarosiq laŋ goge koqyonaqa laŋ waqej. Laŋ waqonaqa Qotei aqa Mondor a binon bulosiq aisiq Yesus aqa jejamuq di awoej.

<sup>11</sup> Awoonaqa laŋ goge dena Qotei na Yesus metonaqa aqa kakro quej. A endegsi minjnaq quej, “Ni ijo Aŋgro qujai. E ni tulaŋ qalaqlaimeqnum. E ni qa tulaŋ areboleboleibeqnu.”

### *Satan a bosiq Yesus walawalaiyoqnej*

<sup>12-13</sup> Onaqa Mondor a Yesus wadau sawaq osi gilsiga di uratonaqa bat 40 a di laqnej. Di laqnaqa Satan bosiqa Yesus a une bei atqa marsiqqa walawalaiyoqnej. Yesus a wagme juwan naŋgi ti soqneb. Sonabqa Qotei aqa laŋ aŋgro naŋgi bosib Yesus siŋgilatoqneb.

### *Yesus a Galili sawaq di aqa wau utru atej*

<sup>14</sup> Bati bei Jon a tonto talq di waiyonab sonaqa Yesus a olo Galili sawaq aiyej. Aisiq dia Qotei aqa anjam bole palontoqnej.

<sup>15</sup> A endegsi maroqnej, “Qotei na aqa segi tamo uŋgasari naŋgi taqatnjsim naŋgo Mandor Koba

sqajqa bati jojomqo. Deqa niñgi are bulyosib Qotei aqa anjam bole nñgo areqaloq di siñgilatiy.”

*Yesus na tamo qolqe nañgi metnjrnaq a dauryeb*

<sup>16</sup> Osiqa Yesus a Galili ya agu kobaqujaq gilej. Gilsiq alile dia walweloqnsiqa ñam atej di Saimon aqa was Andru wo nañgi qe o qaji tamo soqneb deqa nañgi kakañ waiyeqnab unjrej.

<sup>17</sup> Unjrsiqa minjrej, “Niñgi aiyel e daurbiy. Niñgi qe o qaji tamo unub deqa niñgi qe eqnub. Dego kere e wau engitqa niñgi olo tamo oqnnqab.”

<sup>18</sup> Yesus a nañgi degsi minjrnqa nañgi nañgo kakañ uratosib Yesus dauryeb.

<sup>19</sup> Onaqa Yesus a olo walwelosiq gilokiñalayosiqa Sebedi aqa ñiri Jems aqa was Jon wo nañgi aiyel qobuñ miligiq di kakañ braño qandimeqnabqa unjrsiqa metnjrej.

<sup>20</sup> Metnjrnqa nañgo abu Sebedi wau tamo ti qobuñ miligiq di sonabqa nañgi uratnjsib Yesus dauryeb.

*Yesus a tamo bei aqaq dena mondor uge wiyetej*

<sup>21</sup> Onaqa Yesus aqa anjro nañgi ti walwelosib gilsib Kaperneam qureq di branteb. Brantosib sonabqa Juda nañgo yori batiej. Deqa Yesus a Juda nañgo Qotei tal miligiq gilsiq Qotei aqa anjam palontosiq minjroqnej.

<sup>22</sup> Aqa anjam palontej di singila ti. Dal anjam qalie tamo nañgo anjam maroqneb de ti keresai. Yesus a segi anjam di aqa abu. Aqa anjam dena dal anjam qalie tamo nañgo anjam tulan̄ buñyoqnej. Deqa tamo ungasari nañgi Yesus aqa anjam di quisib tulan̄ prugeb.

**23** Bati di tamo bei mondor uge na ojej qaji a Qotei tal miliq di awesoqnej. Deqa a Yesus unsiqa tulan lelenjosiq minjej,

**24** “O Yesus Nasaret qaji tamo, ni iga kiyergwa-jqa bonum? Ni iga padaltgwa bonum e? E ni qalie. Ni Qotei aqa Tamo Boledamu. Ino jejamuq di une bei saiqoji.”

**25** Onaqa Yesus na mondor uge di ɳiriñtosiq minjej, “Ni medabu getentosim tamo di uratosim ulañ.”

**26** Degsi minjnaqa mondor uge dena tamo di kunjimyosiqa tulan lelenjosiq a uratosiq ulañej.

**27** Onaqa tamo ungasari nañgi Yesus aqa mañwa di unsibqa nañgi tulan prugosib segi segi maroqneb, “Yesus a tamo kiyero? A anjam bunuj mareqnu. Aqa anjam bunuj di siñgila ti mareqnu. A segi anjam di aqa abu. Agi a na mondor uge nañgi minjreqnaqa nañgi aqa anjam dauryosib jaraiyeqnub.”

**28** Tamo ungasari nañgi degsib maroqneb. Osib nañgi walwelosib Galili sawa keretosib Yesus aqa mañwa deqa saoqnsib laqneb.

### *Yesus na Pita aqa mimibe boletej*

**29** Onaqa Yesus aqa aŋgro nañgi ti Qotei tal uratosib Saimon Andru wo nañgo tal gogeteb. Jems Jon wo nañgi koba na tal gogeteb.

**30** Tal gogetosibqa Saimon aqa mimibe makobaiyonaq jejamu tulan kan̄kanjonaqa ɳeiesonaq uneb. Deqa Yesus aqa aŋgro nañgi na Yesus minjeb, “Ni na uña di boletqa kere e?” Onaqa minjrej, “Od, e na boletqa kere.”

**31** Degsi minjrsiqa uŋa maiyej qaji aqa areq gilsiga banj ojsiqa tigeltej. Tigeltonaqa aqa jejamu kaŋkan di koboonaqa a tigelosiqa naŋgi inji goiyetnjrej.

*Yesus a tamo uŋgasari gargekoba naŋgi boletnjro-qnej*

**32** Seŋ aiyeqnaqa qure deqaji tamo uŋgasari ma utru segi segi so qaji naŋgi ti mondor uge uge na ojeleŋo qaji naŋgi ti naŋgo was naŋgi na joqoqnsib Yesus aqa areq boqneb.

**33** Boqnsib Yesus soqnej qaji tal meq di koroqneb.

**34** Onaqa Yesus na tamo uŋgasari kalil ma ti soqneb qaji naŋgi boletnjroqnej. Osiqa mondor uge naŋgi dego winjroqnej. Mondor uge naŋgi di Yesus qa qalieeb deqa naŋgi aqa ñam ubtqa mareqnab a na naŋgi saidnjroqnej.

*Yesus a Galili sawaq di Qotei aqa anjam mare mare laqnej*

**35** Onaqa nobqolo ambru Yesus na tamo uŋgasari naŋgi alelnjrsiqa wadau sawaq gilsiga dia Qotei pailyoqnej.

**36-37** Pailyeqnaqa aqa angro naŋgi Saimon koba na a qa ñamosib gilsib itosib minjeb, “Tamo uŋgasari kalil naŋgi ni qa ñameqnub.”

**38** Onaqa Yesus na kamba minjrej, “Niŋgi tigelabqa iga qure qureq giloqnsimqa dia Qotei aqa anjam palontoqnsim tamo uŋgasari naŋgi minjroqnom. E wau di yqajqa deqa mandamq aiyem.”

**39** Degsi minjrsiqa walweloqnsiqa qure qure kalil Galili sawaq di brantoqnsiqa Juda naŋgo Qotei tal miliqi giloqnsiqa Qotei aqa anjam

palontoqnsiq minjroqnej. Osiqa mondor uge uge nañgi winjreqnaqa nañgi na tamo ungasari nañgoq dena jaraiyoqneb.

*Yesus a tamo yu na aqa jejamu ugeelenjej qaji di boletej*

**40** Onaqa tamo bei yu na aqa jejamu ugeelenjej qaji a Yesus aqa areq bosicha aqa singaq di singa pulutosiqa pailyosiq minjej, “O Tamo Koba, ni e boletbqa are soqnimqa e boletbe.”

**41** Onaqa Yesus na tamo di aqa yu unsiqa a qa dulosiqa banj waiyosiq ojej. Ojsiqa minjej, “E ni bolemtmqa areunu. Deqa ino jejamu olo boleeme.”

**42** Onaqa bati qujai deqa aqa yu kalil mosoosiq aqa jejamu boleej.

**43** Onaqa Yesus a singila na minjej, “Ni tigelosim gile.

**44** Ino jejamu boleqo deqa ni tamo qudei nañgi minjraim. Ni gilsim ino jejamu atra tamo osoryosim atraiyqajqa ingi ingi Moses a nami marej qaji di osim Qotei atraiye. Yimqa tamo ungasari nañgi ni numsisib marqab, ‘Bole, ino jejamu boleqo.’ ”

**45** Onaqa a gilsiqa ariya a Yesus aqa anjam di dauryosai. Yesus na boletej deqa a anjam mare mare laqnaqa tamo ungasari tulanç gargekoba nañgi quekriteb. Deqa Yesus a segitosiqa gilsiq wadau sawaq di soqnej. Tamo ungasari nañgi a jujuñyaib deqa a qure beiq di brantosaioqnej. A wadau sawaq di sonaqa tamo ungasari tulanç gargekoba nañgi qure qure kalilq dena tigeloqn-sib aqa areq beleñyoqneb.

**2***Yesus a tamo bei jejamu laiyej qaji di boletej*

<sup>1</sup> Bati bei Yesus a olo Kaperneam gilsiq di sonaqa qure deqaji naŋgi endegsib queb, “Yesus a gago qureq olo bqo. A talq di unu.”

<sup>2</sup> Deqa tamo uŋgasari gargekoba naŋgi bosib siraŋmeq di jujuŋjonabqa Yesus a Qotei aqa anjam palontosiq minjroqnej.

<sup>3</sup> Onaqa tamo qolqe naŋgi na tamo bei jejamu laiyej qaji a saperaq di atsibqa qoboiyosib Yesus aqa talq osi beb.

<sup>4</sup> Osi bosib ɻam ateb di tamo uŋgasari gargekoba naŋgi siraŋme juŋonab unjreb. Deqa naŋgi Yesus aqa areq gilqa keresaiinjrnaqa tal quraq oqsib goge na waqtosibqa tamo sapera qoji gulaintosib ura uratonab Yesus aqa areq aiyej.

<sup>5</sup> Onaqa Yesus a naŋgo areqalo unej di naŋgo areqalo qujai Yesus na tamo jejamu laiyej qaji di boletqa kere. Degsi unsiq deqa tamo di minjej, “O ijo aŋgro, ino une kalil e na kobotetmonum.”

<sup>6</sup> Onaqa dal anjam qalie tamo qudei warum dia awesoqneb qaji naŋgi Yesus aqa anjam di quisibqa naŋgo areqalo na mareb,

<sup>7</sup> “Yesus a kiyaqa anjam degsi marqo? A Qotei misiliŋyqo. Yai na tamo naŋgo une kobotqa kere? Qotei a segi qujai.”

<sup>8</sup> Naŋgi degsib are qaleqnabqa Yesus a naŋgo areqalo di qalieosiqa minjrej, “Niŋgi kiyaqa areqalo di onub?

<sup>9</sup> Anjam kiye e na tamo jejamu laiyqo qaji di minjitqa niŋgi quisib e qa poinjwas? ‘Ino une kalil

e na kobotetmonum,’ anjam de kiyo, ‘Ni tigelosim ino sapera osim walwel,’ anjam de kiyo?

<sup>10</sup> Ariya e segi Tamo Aŋgro. E mandamq endi singila ti unum deqa e na tamo naŋgo une kobotet-njrqa kere. Niŋgi degsi poiŋgwajqa deqa e na tamo di boletqai.” Yesus a naŋgi degsi minjrsiqa tamo jejamu laiyej qaji di koqyosiqa minjej,

<sup>11</sup> “E ni mermqai. Ni tigelosim ino sapera osim ino talq gile.”

<sup>12</sup> Degsi minjnaqa aqa jejamu boleonaqa a tigelosiqa aqa sapera osiqa tamo uŋgasari kalil naŋgo ɻamdamuq di walwelosiq gilej. Onaqa tamo uŋgasari kalil naŋgi Yesus aqa maŋwa di unsibqa naŋgi tulan prugugetosib Qotei aqa ñam soqtosib mareb, “Maŋwa iga endego unonum di kumbra tulan bei. Tamo bei na maŋwa deqaji bei yeqnaq iga nami unosaioqnem.”

### *Yesus na Livai minjej, “Ni e daurbe”*

<sup>13</sup> Onaqa Yesus a olo alile ainaqa tamo uŋgasari gargekoba naŋgi bosib aqa areq di koroonabqa a na Qotei aqa anjam palonteqnaq naŋgi quoqneb.

<sup>14</sup> Dena walwelosiq takis o qaji tamo bei aqa ñam Livai a takis o talq di awesonaq gilsiq itej. A Alfias aqa ɻiri. A itosiq minjej, “Ni e daurbe.” Degsi minjnaqa a tigelosiqa Yesus dauryej.

<sup>15</sup> Onaqa bati bei Yesus aqa aŋgro naŋgi ti Livai aqa talq gilsib awoosib iŋgi uyoqneb. Naŋgi segi sai. Une tamo ti takis o qaji tamo ti gargekoba naŋgi dego koba na Yesus dauryosib Livai aqa talq di awoosib Yesus aqa aŋgro naŋgi ti iŋgi uyoqneb.

**16** Onaqa Farisi qudei nañgi bosib Yesus a une tamo ti takis o qaji tamo ti nañgi koba na ingi uyeqnab unjrsibqa Yesus aqa aŋgro nañgi minjreb, “Yesus a kiyaqa une tamo ti takis o qaji tamo ti nañgi koba na ingi uyeqnub?”

**17** Onaqa Yesus a Farisi naŋgo anjam di qusiqa minjrej, “Tamo ma saiqoji nañgi yu qangra tamo aqaq gilosaieqnub. Tamо ma ti nañgi segi yu qangra tamo aqaq gileqnub. Tamо bei a marqas, ‘E tamo bole. E une saiqoji.’ E tamо deqaji nañgi metnjrit ijoq bqajqa deqa mandamq aiyosai. Tamо a marqas, ‘E une ti.’ E tamо deqaji nañgi metnjrit ijoq bqajqa deqa mandamq aiyem.”

### *Yesus a qurieŋ qa anjam marej*

**18** Bati bei Jon aqa aŋgro nañgi ti Farisi nañgi ti ingi uratoqnsib qurienqneb. Deqa nañgi Yesus aqa areq bosib minjeb, “Jon aqa aŋgro nañgi ingi uratoqnsib qurienqneb. Farisi naŋgo aŋgro nañgi dego ingi uratoqnsib qurienqneb. Ariya ino aŋgro nañgi kiyaqa qurienqneb?”

**19** Onaqa Yesus na kamba minjrej, “Tamo bei a uŋa ban ojqa bati qa aqa was nañgi ti soqnibqa nañgi qurienqab e? Sai.

**20** Bunuuqna nango was a nañgi uratnjrimqa bati deqa nañgi qurienqnsib sqab.

**21** “Tamo bei a gara jugo bunuj osim dena mutu gentosim gara jugo sari braŋoq di qandimqa keresai. Degsi qandimqas di bunuuqna a na gara jugo sari di yansimqa gara mutu bunuj a kiñalaosim gara jugo sari di uratim braŋ qelikobaqas.

**22** Tamо bei a wain bunuj osim ya nobu sariq di qamqa keresai. Ya nobu sari di nami kaŋgrajosiq

singilaej deqa a wain bunuj qamimqa wain a didiqosim ya nobu sari paratosimqa wain bileyosim mandamq aiqas. Ya nobu a dego ugeqas. A wain bunuj osim ya nobu bunujq di qamqas di kere.”

*Yesus a segi yori bati aqa Tamo Koba*

**23** Yori bati bei Yesus aqa angro naŋgi ti wau ambleq na giloqnsibqa aqa angro naŋgi bem sum gei eleŋoqnsib uye uye giloqneb.

**24** Naŋgi degsib gileqnabqa Farisi qudei naŋgi bosib unjrsibqa Yesus minjeb, “Ino angro naŋgi kiyaqa kumbra degyeqnub? Yori bati qa kumbra degyo di getento koba.”

**25** Onaqa Yesus na kamba Farisi naŋgi minjrej, “Nami Devit aqa wau tamo ti naŋgi mamnjrnaqa kumbra yeb qaji di niŋgi buk miliq di sisiyosai kiyo?

**26** Abiatar a atra tamo gate sonaqa bati deqa Devit a atra tal miliq gilsiga Qotei atraiyqajqa bem uysiqa aqa wau tamo naŋgi dego anainjrnraq uyeb. Bem di getento. Di atra tamo naŋgo segi uyqajqa bem. Devit a degyej di a dal anjam grotej. Ariya a Qotei aqa ɻamgalaq di une saiqoji. Ningi anjam di sisiyosai kiyo?”

**27** Osiqa minjrej, “Qotei a yori bati qa are qalsiq tamo naŋgi atosai. A tamo naŋgi qa are qalsiq yori bati atej.

**28** E Tamo Angrø. Deqa e segi na yori bati taqate-junum. E segi yori bati aqa Tamo Koba.”

**3**

*Yori bati qa Yesus a tamo ban qandamyej qaji di boletej*

<sup>1</sup> Olo yori bati bei Yesus a Juda naŋgo Qotei tal miligiq gilsiga tamo bei ban qandamyej qaji a di sonaq unej.

<sup>2</sup> Onaqa Farisi naŋgi Yesus koqyoqneb. Naŋgi are qaleb, “Yesus a yori bati qa tamo di boletgas kiyo? Yimqa minjqom, ‘Ni na yori bati grottonum.’” Deqa naŋgi Yesus koqyoqneb.

<sup>3</sup> Onaqa Yesus a tamo baŋ qandamyej qaji di minjej, “Ni tigelosim au.”

<sup>4</sup> Degsi minjnaqa a tigelosiqa Yesus aqa areq gileqnaqa Yesus na Farisi naŋgi nenemnjrej, “Iga yori batí qa kumbra bole yqom kiyo kumbra uge yqom kiyo? Tamo bei a padalqa laqnimqa iga na aqaryaiyonam a bole sqas di kere kiyo iga na uratonam a padalqas di kere kiyo? Dal anjam a kiyersi marqo? Ningi na merbiy.” Onaqa Farisi naŋgi kamba olo anjam bei Yesus minjosai. Naŋgi mequmesoqneb.

<sup>5</sup> Naŋgo are geteŋnjresoqnej deqa Yesus a naŋgi koqnjrej. Osiqa naŋgi qa minjin oqetonaqa tamo baŋ qandamyej qaji di minjej, “Ni ino baŋ waiy.” Degsi minjnaqa aqa baŋ waiyonaq boleej.

<sup>6</sup> Onaqa Farisi naŋgi Qotei talq dena oqedosib Herot aqa wau tamo naŋgi ti koba na koroosib naŋgi kiyersib Yesus qalib moiqajqa deqa qairo-qneb.

*Tamo uŋgasari gargekoba naŋgi Yesus daury-oqneb*

**7-8** Onaqa Yesus aqa angro naŋgi ti tigelosib tamo uŋgasari kalil naŋgi uratnjsrib alile aisib di soqneb. Bati deqa tamo uŋgasari tulaŋ gargekoba naŋgi endegsib queb, “Yesus a maŋwa gargekoba yeleŋeqnu.” Degr̄sib quisibqa Yesus dauryosib alile aisib aqaq di korooqneb. Galili sawa naŋgi ti Judia sawa naŋgi ti Jerusalem qure naŋgi ti Idumia sawa naŋgi ti qure kalil Jordan ya taqal beiq di soqneb qaji naŋgi ti Tair qure ti Saidon qure ti naŋgi kalil beleŋosib Yesus aqaq di korooqneb.

**9** Onaqa Yesus na aqa angro naŋgi endegsi min-rej, “Qobuŋ bei atib soqnem. Tamо uŋgasari naŋgi bosib e jujuŋbaib deqa e qobuŋ gogetosiy di awoqai.” Onaqa aqa angro naŋgi qobuŋ bei atnab soqnej. Naŋgi degyeb. Di kiyaqa?

**10** Yesus a nami tamo uŋgasari gargekoba naŋgi boletnjroqnej. Deqa tamo ma ti kalil naŋgi aqa areq boqnsibqa naŋgo baŋ aqa jejamuq di atqa maroqnsib a jujuŋyoqneb.

**11** Tamо mondor uge uge na ojeleŋo qaji naŋgi dego Yesus aqa areq boqneb. Boqnsibqa mondor uge naŋgi na Yesus unoqnsib aqa siŋgaq di siŋga pulutoqnsib leleŋjoqnsib minjoqneb, “Ni Qotei aqa Niri.”

**12** Degr̄sib minjeqnabqa a naŋgi singila na saidnjroqnsiq minjroqnej, “Niŋgi ijo ñam ubtosib maraib.”

### *Yesus a tamo 12 naŋgi giltnjrej*

**13** Onaqa Yesus a dena walwelosiqa manaq oqej. A endegsi are qalej, “E na tamo qudei giltnjritqa naŋgi e koba na laqnsibqa ijo wau ojoqnnqab.” A

degsi are qalsiqa manaq oqsiq dia tamo qudei naŋgi metnjrnaqa aqa areq beb.

<sup>14</sup> Bonabqa a na tamo 12 naŋgi giltnjrej. Naŋgi a ombla sqajqa deqa ti a na naŋgi qariŋnjrimqa naŋgi aqa anjam mare mare laqajqa deqa ti naŋgi giltnjrej.

<sup>15</sup> Naŋgi na mondor uge uge tamo uŋgasari naŋgo jejamuq dena winjrqajqa deqa ti naŋgi giltnjrej.

<sup>16</sup> Tamo 12 giltnjrej qaji nango ñam agiende. Bei Saimon. Yesus na aqa ñam bei Pita waiyej.

<sup>17</sup> Bei Sebedi aqa ɻiri Jems aqa was Jon wo. Naŋgo ñam bei Yesus na Boanerges wainjrej. Ñam di aqa damu, “Tamo kola bul.”

<sup>18</sup> Ariya Andru Filip wo. Bei Bartolomyu Matyu wo. Bei Tomas. Bei Alfias aqa ɻiri Jems. Bei Tadius. Bei Saimon agi Rom naŋgi winjrqajqa maroqnej qaji.

<sup>19</sup> Ariya bei Judas Iskariot agi bunuqna Yesus osiqa jeu tamo naŋgo banq di atej qaji.

*Tamo qudei naŋgi maroqneb, “Yesus a Belsebul aqa siŋila na waueqnu”*

<sup>20</sup> Onaqa Yesus a tal bei gogetosiq di son-aqa tamo uŋgasari gargekoba naŋgi olo bosib korooqneb. Deqa aqa angro naŋgi ti inŋi uyqa batiaiinjrej.

<sup>21</sup> Yesus aqa was naŋgi aqa ai koba na degsib quisibqa Yesus oqajqa marsib qure deq gileb. Naŋgi maroqneb, “Yesus a nanariqo kiyo?”

<sup>22</sup> Onaqa dal anjam qalie tamo qudei Jerusalem dena beb qaji naŋgi Yesus yomuiyoqnsib maroqneb, “Mondor uge naŋgo gate koba Belsebul a

Yesus aqa jejamuq di unu. Siñgila dena Yesus na mondor uge nañgi winjreqnu.”

<sup>23</sup> Onaqa Yesus a nañgi metnirnaqa aqa areq bonabqa yawo anjam bei endegsi minjrej, “Satan na aqa segi mondor uge nañgi kiyersim winjrqas? Di keresai.

<sup>24</sup> Tamо nañgi qure qujaiq di unub qaji nañgi segi poaiyelosib qotqab di nañgi koba na geregere sqa keresai.

<sup>25</sup> Tamо nañgi tal qujaiq di unub qaji nañgi segi poaiyelosib qotqab di nañgi degо koba na geregere sqa keresai.

<sup>26</sup> Dego kere Satan na aqa segi mondor uge nañgi jeutnjrsim winjrqas di aqa siñgila koboosim aqa wau ulonjas.

<sup>27</sup> “Tamo bei a tamо siñgila koba bei aqa tal gogetosim aqa ingi ingi kalil bajinqa keresai. A mati tamо siñgila di sil na tontim soqnimqa di aqa ingi ingi kalil bajinjas. Tontqasai di aqa ingi ingi bajinqa keresai.

<sup>28</sup> “E bole merngwai. Tamо ungasari nañgo une kalil Qotei na kobotetnjrqas. Tamо ungasari nañgi misiliñ anjam mareqnub une di degо Qotei na kobotetnjrqas.

<sup>29</sup> Ariya tamо a Mondor Bole misiliñqas une di Qotei na kobotqasai. Une di tamо aqa jejamuq di gaigai sqas.”

<sup>30</sup> Yesus na dal anjam qalie tamо nañgi anjam degsi minjrej. Di kiyaqa? Nañgi maroqneb, “Yesus a mondor uge ti.”

*Yesus a marej, “Ijo ai ijo was nañgi tal qabe?”*

**31** Onaqa Yesus aqa was naŋgi aqa ai koba na bosib tal oqeq di tigeleb. Yesus a warum miligiq di sonaqa naŋgi oqeq di tigelosib tamo qudei minjreb, “Iga Yesus qa bonum. Deqa niŋgi a minjib endeq bem.”

**32** Onaqa tamo uŋgasari Yesus aqa areq di awesoqneb qaji naŋgi na Yesus minjeb, “Ino was naŋgi ino ai ombla na ni qa bonub agi oqeq di tigelejunub.”

**33** Onaqa Yesus na kamba minjrej, “Ijo ai ijo was naŋgi tal qabe?”

**34** Degsi minjrsiqa tamo uŋgasari aqa areq di awesoqneb qaji naŋgi koqnjrsiqa minjrej, “Niŋgi segi ijo ai ijo was naŋgi.

**35** Niŋgi quiy. Tamo a Qotei aqa areqalo dauryognqas di a ijo was bole. A ijo jaja bole. A ijo ai bole.”

## 4

### *Jesus a saga yago qa yawo anjam marej*

**1-2** Onaqa Yesus a olo alile ainaqa tamo uŋgasari tulaŋ gargekoba naŋgi bosib aqaq di koroonabqa a sasalosiqa qobun bei gogetosiq di awoej. Awoosiqa tamo uŋgasari kalil naŋgi alile di sonabqa a na yawo anjam gargekoba minjroqnej.

A na yawo anjam bei endegsi minjrej,

**3** “Niŋgi quiy. Tamo bei a gilsiqa aqa inŋgi wauq di saga yago breiyelenjej.

**4** Breiyonaqa jagwa na saga yago qudei puyon-aqa gam qalaq aiyeleñeb. Ainabqa qebari naŋgi bosib uyekriteb.

**5** Saga yago qudei mandam lanjaq di aiyeleñeb. Mandam di guma meniñ ti. Gogeq di mandam kiñala. Deqa saga yago aiyeleñosib urur oqoqujateb.

**6** Nañgo jirim tulan̄ guma aiyosai deqa señ oqsiq kañkañonaqa nañgi laosib moreñeb.

**7** Saga yago qudei sil luwit ambleq di aiyeleñeb. Dena oqeb qaji sil luwit na degó dauryosiq oqsiq kabutnırnaq geitosai.

**8** Saga yago qudei mol mandam boledamuq di aiyeb. Di aisib oqoboledamuyosib gei tulan̄ gargekoba atelen̄eb. Qudei 30. Qudei 60. Qudei 100.”

**9** Yesus na tamo uñgasari nañgi yawo anjam degsi minjrsiq koboonaqa olo endegsi minjrej, “Tamo a dabkala ti sqas di a ijo anjam endi geregere quem.”

### *Yesus a kiyaqa tamo uñgasari nañgi yawo anjam minjroqnej?*

**10** Onaqa Yesus na tamo uñgasari nañgi uratnır-siqa a kiñala qalaq gilsıqa a segi sonaqa aqa angro 12 nañgi ti tamo qudei a dauryosib laqneb qaji nañgi ti aqa areq bosibqa aqa yawo anjam di aqa utru geregere qaliegqajqa deqa nenemyeb.

**11** Nenemyonabqa a na kamba endegsi minjrej, “Qotei na aqa segi tamo uñgasari nañgi taqatnırsim nañgo Mandor Koba sqas. Anjam di aqa utru uliejunu. Di Qotei na babtimqa ijo angro niñgi segi utru qaliegqab. Ariya tamo uñgasari qala qalaq di unub qaji nañgi yawo anjam segi minjroqñqai.

**12** Deqa nañgi ñam atoqnqab di ijo anjam aqa damu unsib poinjrqasai. Nañgi dab atoqnqab di

ijo anjam aqa utru quqwasai. Osib poinjrqasai dego. Deqa naŋgi are bulyosib Qotei aqaq bqa keresai. Deqa Qotei a naŋgo une kobotetnjqasai."

*Saga yago qa yawo anjam aqa utru Yesus na babtej*

<sup>13</sup> Osiqa Yesus a olo aqa aŋgro naŋgi endegsi minjrej, "Saga yago qa yawo anjam maronum di aqa utru niŋgi poiŋgosai e? Dego di niŋgi kiyersib ijo yawo anjam kalil qa poiŋgwas?"

<sup>14</sup> Tamo a saga yago breiyej di a Qotei aqa anjam breiyej.

<sup>15</sup> Saga yago qudei gam qalaq ainabqa qebari naŋgi bosib uyekriteb di aqa utru endegsi unu. Tamo qudei naŋgi Qotei aqa anjam quqwab. Ariya anjam di naŋgo are miliq di soqnimqa Satan a urur bosim anjam di olo yainjrqas. Qotei na naŋgo are miliq di anjam di atej ariya Satan a bosim olo yainjrqas.

<sup>16</sup> Saga yago qudei mandam lanjaq di aiyeb qaji di aqa utru endegsi unu. Tamo qudei naŋgi Qotei aqa anjam qusib tulan areboleboleinjrimqa anjam di oqujatosib naŋgo areq atqab.

<sup>17</sup> Ariya anjam di naŋgo are miliq tulan guma aiyosai. Deqa sokiñala Qotei aqa anjam gotraŋyo qaji tamo qudei na bosib naŋgi gulbe enjrsib uegeueinjrqab. Yimqa naŋgo areqalo Yesus qa singilateqnub qaji di naŋgi olo ulontqab.

<sup>18-19</sup> Saga yago qudei sil luwit ambleq di aiyeb qaji di aqa utru endegsi unu. Tamo qudei naŋgi Qotei aqa anjam qusibqa ariya bunuqna naŋgi olo mandam qa ingi ingi qa are koba qaloqnsib ñoro koba oqnqajqa are prugnjroqnqas. Yimqa

kumbra dena nañgi gisanñjrsim Qotei aqa anjam nañgo are miligiq di tentim loumzas. Saga yago uge nañgi gei bole atosaieqnub dego kere.

<sup>20</sup> Saga yago qudei mol mandam boledamuq di aiyeb qaji di aqa utru endegsi unu. Tamo qudei nañgi Qotei aqa anjam quhib nañgo are miligiq di geregere ojsib siñgilatqab. Deqa Qotei aqa anjam di nañgo are miligiq di saga bul tulan kobaqas. Qudei 30. Qudei 60. Qudei 100.”

*Tamo bei a lam qatrentosim pulonjamqa guwe na kabutqasai*

<sup>21</sup> Osiga Yesus a olo minjrej, “Tamo bei a lam qatrentosim pulonjamqa guwe na kabutqasai. Bi-jal surumq di atqasai. Boleq di gaintim warum suwañjesqas.

<sup>22</sup> Dego kere kumbra kalil uliejunu qaji di Qotei na boleq atqas. Kumbra kalil kabuejunu qaji di dego Qotei na babbqas.

<sup>23</sup> Tamo a dabkala ti sqas di a ijo anjam endi geregere quem.”

<sup>24</sup> Osiga Yesus a olo minjrej, “Anjam ningi queqnub qaji di geregere quoqniy. Niñgi geregere quoqnnqab kere dego Qotei a kamba powo engoqnqas. Osim olo powo tulan koba engoqnqas.

<sup>25</sup> Tamo a powo ti sqas di Qotei na powo olo yimqa a powo koba oqas. Ariya tamo a powo ti sqasai di powo kiñala aqaq di unu qaji di Qotei na olo yaiyim a laña sqas.”

*Saga yago nañgi segi oqeñejeqnub*

<sup>26</sup> Osiga Yesus a olo marej, “Qotei na aqa segi tamo uñgasari nañgi taqatnjsim nañgo Mandor

Koba sqas. Kumbra di tamo bei a saga yago breiye-qnu dego kere.

<sup>27</sup> Tamo di a qolo ḡeioqnsiqa nobqolo a olo tigelo-qnsiqa walweleqnu. A kumbra degyeqnaqa saga yago naŋgi segi kokitoqnsibqa oqelenejeqnub. Saga yago naŋgi kiyersib oqelenejeqnub di tamo a qaliesai.

<sup>28</sup> Mandam a segi waueqnaqa saga yago naŋgi kokitoqnsibqa baŋgateqnub. Dena sotoqnsibqa geitoqnsibqa melieqnub.

<sup>29</sup> Meli sau bqo deqa tamo di a bosim serie na giŋgeŋyosim oqas.”

### *Sis yago qa yawo anjam*

<sup>30</sup> Osiqa Yesus a olo marej, “Qotei na aqa segi tamo ungasari naŋgi taqatnjsim naŋgo Mandor Koba sqas. Kumbra di aqa utru ningi geregere poiŋgwajqa deqa yawo anjam bei endegsi merŋgwai.

<sup>31-32</sup> Kumbra di tamo bei na sis yago osiq aqa wauq di yagej dego kere. Sis yago naŋgi tulan kiňilala kas yago bul. Ingi ingi qudei naŋgo yago kokba yala. Sis yago naŋgi tulan kiňilala. Ariya sis yago di tamo bei na osim aqa wauq di yagimqa bunuqna a oqsim tulan kobaqujaqas. Osim ḥam qudei bunjrsim dani kokba atelenqas. Amqa qebari naŋgi bosib aqa waburq di awoelenqab.”

### *Yesus a yawo anjam gargekoba maroqnej*

<sup>33</sup> Yesus na tamo ungasari naŋgi yawo anjam gargekoba deqaji minjroqnej. Naŋgi aqa yawo anjam quqwa kere deqa a degsi minjroqnej.

<sup>34</sup> A anjam bei minjrosaioqnej. Yawo anjam segi minjroqnej. Olo segitoqnsiqa aqa segi angro

naŋgi yawo anjam aqa utru geregere plaltosiq minjroqnej.

*Yesus a jagwa ti ya korkor ti anjam minjrnaq laeb*

<sup>35</sup> Onaqa bilaqtonaqa Yesus na aqa aŋgro naŋgi endegsi minjrej, “Iga gilsim ya agu taqlal beiq di brantqom.”

<sup>36</sup> Degsi minjrsiqa naŋgi koba na tamo uŋgasari kalil naŋgi uratnjsibqa qobuŋ na gileqnabqa tamo qudei naŋgi dego naŋgo qobuŋ osib Yesus dauryosib giloqneb.

<sup>37</sup> Yesus aqa aŋgro naŋgi ti qobuŋ na gileqnabqa jagwa tulan koba tigelosiq ya korkortosiqa qobuŋ qaloqnsiqa mormaŋ miligiq aiyeqnaqa ya maqej.

<sup>38</sup> Yesus a nami qobuŋ bunuq di gate kuluŋ atsiqa ɻeisiq qambumtej. Deqa aqa aŋgro naŋgi tulan ulauetosib aqa areq bosib dudumyosib minjeb, “O Qalie Tamo, iga padalqa laqnum. Ni deqa are qalosai kiyo?”

<sup>39</sup> Onaqa Yesus a tigelosiqa jagwa ti ya ti singila na minjrej, “Ningi laoiy.” Minjrnaqa jagwa laej. Ya dego maninej.

<sup>40</sup> Onaqa Yesus na aqa aŋgro naŋgi endegsi minjrej, “Niŋgi kiyaga ulaosib e qa yala poinjgosai?”

<sup>41</sup> Onaqa aqa aŋgro naŋgi olo tulan ulauetosib segi segi maroqneb, “Yesus a tamo kiyero deqa jagwa ti ya ti minjrqoqa aqa anjam quisib laonub?”

## 5

*Yesus a tamo bei aqa jejamuq na mondor uge gargekoba winjretej*

<sup>1</sup> Onaqa Yesus aqa aŋgro naŋgi ti qobuŋ na gilsib ya agu taqal beiq di brantosib Gerasa sawaq di tiryeb.

<sup>2</sup> Tiryosib Yesus a qobuŋ uratosiq mandamq ainaqa tamo bei a tamo sub ato sawaq dena brantosiq Yesus aqa areq bej. Tamo di a mondor uge uge na ojeleŋo qaji.

<sup>3</sup> A bati gaigai tamo sub ato sawaq di ŋeioqnej. A tamo siŋgila koba. Tamo bei na a ojqa keresai. Sil kokba na a tontqa keresai dego.

<sup>4</sup> Bati gargekoba tamo qudei naŋgi aqa siŋga ti banj ti sil kokba na tonteq nabqa a olo kukogyoqnej. Tamo bei na a ojqa keresai bole sai.

<sup>5</sup> A bati gaigai qolo ti qanam ti tamo sub ato sawaq di tulanq leleŋoqnsiqa aqa segi jejamu meniŋ na pupoiyoqnej. A manaq di dego kumbra di yoqnej.

<sup>6-8</sup> Deqa a isaq na ñam atsiqa Yesus unsiqa urur ti aqa areq bosiq aqa siŋgaq di siŋga pulutej. Onaqa Yesus na mondor uge di minjej, “O mondor uge, ni tamo di uratosim ulaŋ.” Degsi minjnaqa mondor uge dena tulanq leleŋosiqa siŋgila na pailosiq Yesus minjej, “O Yesus, Qotei Goge Koba aqa Ñiri, ni e kiyerbqajqa bonum? E Qotei aqa ñam na ni mermqai, ni e jaqatiŋ ebaim.”

<sup>9</sup> Onaqa Yesus na mondor uge di nenemyej, “Ino ñam yai?” Degsi nenemyonaqa minjej, “Ijo ñam Qoto Tamo Gargekoba. Iga mondor tulanq gargekoba tamo endi aqa jejamuq di unum.”

<sup>10</sup> Osiqa siŋgila na pailosiq Yesus minjej, “Ni iga sawaq beiq waigaim.”

<sup>11</sup> Bati deqa bel tulanq gargekoba naŋgi mana

goge dia suwaroqneb.

<sup>12</sup> Deqa mondor uge naŋgi na Yesus minjeb, “Ni iga qariŋgimqa iga bel naŋgo jejamuq gilelenqom.”

<sup>13</sup> Mondor uge naŋgi degsib Yesus minjnabqa a na naŋgi odnjrnaqa tamo di uratosibqa bel naŋgo jejamuq gilelenjeb. Gilnabqa bel kalil naŋgi gurgurosib botau dena prugelenjosib yaq aisib ya uysib moreňeb. Bel moreňeb qaji naŋgi sisiyeb 2,000.

<sup>14</sup> Onaqa bel taqatoqneb qaji tamo naŋgi kumbra di unsibqa jaraiyosib qure miliqqaisib tamo uŋgasari kalil naŋgi sainjroqnsib laqneb. Gamq di dego sainjroqnsib laqneb. Onaqa tamo uŋgasari naŋgi kumbra di unqajqa beb.

<sup>15</sup> Bosib Yesus aqa areq di koroosib ɻam ateb di tamo nami mondor uge ti soqnej qaji aqa areqalo boleosiq gara tigsiq awesonaq uneb. Unsib tulan ulaugeteb. Di kiyaqa? Mondor uge tulan gargekoba nami tamo di aqa jejamuq di soqneb deqa.

<sup>16</sup> Onaqa tamo naŋgo ɻamdamu na Yesus a mondor uge di winjrnaq uneb qaji naŋgi bel qa ti mondor uge qa ti tamo uŋgasari naŋgi sainjrnab queb.

<sup>17</sup> Qusibqa Yesus minjeb, “Ni gago sawa endi uratosim sawa beiq gile.”

<sup>18</sup> Onaqa Yesus a qobun gogetosiq gilqa laqnaqa tamo aqaq na Yesus na mondor uge uge winjretej qaji a siŋila na pailosiq minjej, “E ni daurmqai.”

<sup>19</sup> Onaqa Yesus na saidyosiq minjej, “Ni olo ino segi qureq gile. Gilsim Tamo Koba a ni qa dulosiqa kumbra tulan boledamu emqo deqa ino was naŋgi sainjre.”

**20** Onaqa a puluosiq aqa qureq gilsiq Yesus na a kumbra tulanj boledamu yej deqa Dekapolis sawa (ñam di aqa damu, Qure 10) dia tamo uñgasari kalil nañgi sainjroqnsiq laqnej. Sainjreqnaqa nañgi aqa anjam quoqnsib tulanj prugoqneb.

*Uña bei a Yesus aqa gara ojnaq boletosiq olo añgro moiyej qaji a tigeltej*

**21** Onaqa Yesus a olo qobuñ gogetosiqa ya agu taqal beiq gilej. Gilsiq qobuñ tiryonaq mandamq aisiq alile di sonaqa tamo uñgasari tulanj gargekoba bosib aqaq di korooqneb.

**22-23** Koroosib sonabqa Qotei tal taqato tamo bei aqa ñam Jairus a walwelosiq Yesus unsiqa aqa areq bosiqa sinja pulutosiq sinjila na pailyosiq minjej, “O Tamo Koba, ijo añgro sebiñ a moiqa laqnu. Deqa ni bosim ino banj aqa jejamuq di atimqa a olo boleosim ñambile sqas.”

**24** Onaqa Yesus na Jairus odyosiqa a dauryosiq gileqnabqa tamo uñgasari tulanj gargekoba nañgi dego nañgi aiyel daurnjrsib jujuñosib giloqneb.

**25** Gileqnabqa nañgo ambleq di uña bei ma ti soqnej qaji a nañgi daurnjrsiq giloqnej. Uña di a nami bai na unej leñ aiyoqnsiq degsi soqnej wausau 12 uratej.

**26** Yu qaŋgra tamo gargekoba nañgi nami a boletqa yeq nab a jaqatinkobaiyoqnej. A ma gereiyo talq giloqnsiqa silali koba urateqnaqa nañgi aqa jejamu gereiyeq nabqa a boleosaioqnej. Aqa ma olo kobaqujaoqnej.

**27-28** Deqa a Yesus aqa ñam quisiqa are qalej, “E aqa gara mutu segi banj na ojitqa ijo ma kobo-

pas.” Degsi are qalsiqa Yesus aqa qoreq na dadauryosiqa banj waiyosiq aqa gara mutu ojej.

<sup>29</sup> Ojnaqa aqa lej aiyoqnej qaji di koboej. Koboonqa a aqa segi jejamu qalieosiqa marej, “Bole, ijo ma saiqa.”

<sup>30</sup> Onaqa Yesus a poiyej, “Singila qudei ijo jejamu uratosiq gilqo.” Degsi poiyonqa bulosiq tamo ungasari tulanç gargekoba soqneb qaji nañgi unjrsiqa nenemnjrej, “Yai na ijo gara ojqa?”

<sup>31</sup> Degsi nenemnjranaqa aqa aŋgro nañgi na minjeb, “Ni kiyaqa degsi nenemonum? Ni une. Tamo ungasari tulanç gargekoba nañgi ni daurmosib jujuŋmejunub.”

<sup>32</sup> Onaqa Yesus a uŋa gara mutu ojej qaji di unqajqa ñam atoqnej.

<sup>33</sup> Onaqa uŋa di a endegsi qalieej, “Ijo ma saiqa deqa Yesus a e nubqajqa ñam ateqnu.” A degsi qalieosiqa tulanç ulaugetosiq are tonþtonyonaqa jinga na bosiq Yesus aqa areq di siŋga pulutosiq a segi qa ubtosiq minjej, “E na ino gara mutu ojonom.”

<sup>34</sup> Onaqa Yesus na minjej, “O uŋa, ni ino areqalo e qa siŋgilatosim ijoq bonum deqa ino ma agi koboqo. Deqa ni are lawo na gilsim bole soqnime.”

<sup>35</sup> Yesus a uŋa degsi minjeqnaqa tamo qudei nañgi Jairus aqa talq dena bosibqa gamq di Jairus Yesus wo turosib nañgi na Jairus minjeb, “Úŋgum. Ino aŋgro a nami moiqo. Deqa ni na Qalie Tam a laŋa wau koba yaim. Úratim aiyem.”

<sup>36</sup> Onaqa Yesus a naŋgo anjam di quisiga Jairus minjej, “Ni ulaaim. Ni e qa ino areqalo siŋgilatime.”

**37-39** Degsi minjsiqa tamo uŋgasari kalil naŋgi a dauryqa saidnjrsiqa Jems aqa was Jon wo Pita ombla naŋgi segi joqsiqa Jairus koba na gilsib aqa talq di branteb. Brantosib Yesus a ɻam atej di tamo uŋgasari gargekoba naŋgi qatronj koba yoqnsib akam murqumyeqnab unjrej. Unjrsiqa tal gogetosiqa minjrej, “Niŋgi kiyaqa qatronj koba yoqnsib akameqnub? Aŋgro di a moiyosai. A laŋa ɻeisiq qambumtejunu.”

**40** Degsi minjrnaqa naŋgi Yesus kikiyeb. Naŋgi qalieeb, “Aŋgro a nami moiyoboletqo.” Degtisib qalieosib deqa Yesus kikiyeb. Onaqa Yesus a naŋgi kalil minjrej, “Niŋgi sasaloiy.” Degsi minjrnaqa naŋgi sasalonabqa Yesus a aŋgro moiyej qaji aqa ai abu osiqa aqa segi aŋgro qalub naŋgi dego joqsiqa aŋgro aqa warum miligiq gilej.

**41** Gilsiq aŋgro aqa ban̄ titosiqa minjej, “Talita, kum.” Di Hibru anjam. Anjam di aqa damu, “O aŋgro, ni tigel.”

**42** Degsi minjnaqa aŋgro di a olo ɻambile osiqa urur tigelej. Tigelosiq walwelej. Aŋgro aqa wausau 12. Onaqa naŋgi kalil Yesus aqa maŋwa di unsibqa tulan̄ prugeb.

**43** Onaqa Yesus a naŋgi siŋgila na endegsi minjrej, “Niŋgi ijo maŋwa endi unonub deqa tamo qudei minjraib.” Osiqa marej, “Niŋgi aŋgro endi inŋgi anaiiy.”

## 6

*Yesus aqa qure utru naŋgi aqa anjam quetosai*

**1** Onaqa Yesus a sawa di uratosiqa aqa aŋgro naŋgi joqsiqa aqa segi qure utruq gilej.

<sup>2</sup> Gilsiq di sonaqa yori batiej. Deqa a Juda naŋgo Qotei tal miligiq gilsiga tamo uŋgasari gargekoba sonabqa tigelosiqa Qotei aqa anjam palontosiq minjroqnej. Minjreqnaqa tamo uŋgasari naŋgi aqa anjam quisibqa tulaj prugugetosib maroqneb, “Yesus a powo qabe na osiqa anjam singila endeqaji palontosiq mergeqnu? A kiyersiq maŋwa endeqaji babtelenjeqnu?

<sup>3</sup> Iga qalie, a laŋa tal gereiyo qaji tamo. A Maria aqa ɻiri. A Jems na Joses na Judas na Saimon na naŋgo was. Aqa jaja kalil naŋgi agi iga koba na endi unum.” Tamo uŋgasari naŋgi degsib yomu anjam marsib Yesus qa ugeeb.

<sup>4</sup> Onaqa Yesus na kamba minjrej, “Qotei aqa medabu o qaji tamo bei aqa segi qure utruq gilsim anjam minjroqnqas di naŋgi aqa anjam quetqa asginjrqas. Deqa a ɻam saiqoji sqas. Aqa segi talq di dego a ɻam saiqoji sqas. Ariya a qure bei beiq giloqnsim anjam minjroqnqas di naŋgi aqa anjam quetoqnsib aqa ɻam soqtoqqnqab.”

<sup>5</sup> Yesus a naŋgi degsi minjrsiqa aqa segi qure utruq di maŋwa bei yqajqa keresaiyej. A tamo quja quja segi naŋgo gateq di aqa baŋ atnaqa naŋgo ma koboej.

<sup>6</sup> Aqa segi qure utru naŋgi a qa naŋgo areqalo singilatosai deqa a are gulbeijej.

### *Yesus na aqa aŋgro 12 naŋgi wau enjrej*

Onaqa Yesus a walwelosiqa qure bei beiq giloqnsiqa Qotei aqa anjam palontoqnej.

<sup>7</sup> Osiqa bati bei a na aqa aŋgro 12 naŋgi metnjrnaqa aqa areq bonabqa naŋgi tamo uŋgasari naŋgo jejamuq na mondor uge uge winjroqnnqajqa

deqa siŋgila enjrej. Osiqa minjrej, “Niŋgi aiye aiyel giloqnsibqa qure qureq di ijo anjam palontoqnsib laqniy.

<sup>8</sup> Niŋgi ingi ingi osib gilaib. Ingi uyo bei aib. Nuŋgo qaqqun aib. Silali osib gilaib. Toqon̄ segi osib walweliy.

<sup>9</sup> Siŋga tatal dego jigsib giliy. Gara jugo aiye aiyel aib.”

<sup>10</sup> Osiqa minjrej, “Niŋgi qure bei beiq di brantqnsibqa tal qujaiq di soqniy. Dia sosib dena olo tigelosib qure beiq giloqniy.

<sup>11</sup> Tamo bei na niŋgi gereingwa uratimqa kiyo nuŋgo anjam quqwa asgiyimqa kiyo niŋgi qure di uratqa oqnsib nuŋgo siŋga tatal tumbrum butuyogniy. Yimqa naŋgi nuŋgo kumbra di unsib poinjrqas, ‘Bole, iga kumbra ugetonum.’ ”

<sup>12</sup> Yesus na aqa angro 12 naŋgi degsi minjrsiq qariŋnjrnaqa naŋgi qure qureq giloqnsibqa Qotei aqa anjam palontoqnsib tamo uŋgasari naŋgi endegsib minjroqneb, “Niŋgi are bulyiy.”

<sup>13</sup> Osib mondor uge uge naŋgi winjroqnsibqa tamo uŋgasari naŋgo gateq di goreŋ bilenteqnabqa naŋgo ma saioqnej.

### *Herot a are qalej, “Yesus a Jon yansnjro qaji”*

<sup>14</sup> Yesus aqa angro naŋgi aqa ñam mare mare laqnabqa Mandor Herot a quej. Tamo uŋgasari gargekoba naŋgi dego qusib maroqneb, “Tamo di a Jon yansnjro qaji. A moisiq olo subq na tigelqo. A deqa siŋgila osiqa maŋwa endeqaji babteleŋeqnu.”

<sup>15</sup> Onaqa tamo qudei naŋgi maroqneb, “Tamo di a Elaija olo bqo.” Onaqa qudei naŋgi maroqneb,

“Tamo di a Qotei aqa medabu o tamo naŋgi nami soqneb deqaji bei.”

<sup>16</sup> Ariya Herot a segi Yesus aqa ñam quſiqa marej, “Tamo di a Jon e nami kakro gentetem qaji. A moisiq olo subq na tigelqo.”

<sup>17-18</sup> Herot a nami aqa was Filip aqa ɻauŋ Herodias yaiyosiq ej. Deqa Jon yansnipro qaji a na Herot minjoqnej, “Ni ino segi was aqa uŋa em di kumbra bolesai. Ni kumbra ugeteqnum.” Jon na Herot degsi minjoqnej. Deqa Herot a Jon qa minjiŋ oqettonaqa aqa qaja tamo qudei naŋgi qariŋnjrnaqa gilsib Jon ojsib sil na qosisib tonto talq di waiyeb.

<sup>19</sup> Bati deqa Herot aqa ɻauŋ a Jon qa tulan ɻirinjugetej deqa a na Herot wainyosiq minjoqnej, “Ni na Jon qalim moiym.” Yeqnaqa Herot na saidyoqnej.

<sup>20</sup> Di kiyaqa? A Jon qa ulaoqnej deqa. Deqa a Jon geregere taqatoqnej. A endegsi qaliej, “Jon a tamo bole. Aqa jejamuq di une bei saiqoji. A Qotei aqa tamo tiŋtiŋ.” Herot a degsi qalieosiq deqa a Jon taqatoqnsiqa aqa anjam quoqnej. Quoqnsiqa are koba qaloqnej. A Jon aqa anjam quqwajqa tulan arearetoqnej.

<sup>21</sup> Ariya bati bei Herot aqa ɻauŋ a Jon qalim moiqajqa gam endegsi itej. Herot aqa ɻambabo bationaqa Herot na maruro atsiqa aqa tamo kokba ti aqa qaja tamo naŋgo gate kokba ti Galili sawa taqato tamo naŋgi ti metnjernej bosib aqa talq di koroeb.

<sup>22</sup> Koroosib ingi uyeqnabqa Herot aqa ɻauŋ aqa aŋgro sebiŋ a warum miligiq bosicha naŋgi lou tuet-njreqnaqa naŋgi a unsibqa tulan arebolebolein-jrej. Deqa Herot na aŋgro sebiŋ di minjej, “Ni ijo

ingi kiye oqajqa merbqam e ni emqai.”

<sup>23</sup> Osiqa aqa anjam di olo siñgilatosiqa minjej, “Ni ijo ñoro kalil ambleq na potosim oqajqa marqam emqai. E ijo anjam di uratqasai bole sai.”

<sup>24</sup> Onaqa angro sebiñ a gilsiq aqa ai nenemyej, “E ingi kiye qa Herot minjqai?” Onaqa minjej, “Ni Jon yansnjro qaji aqa gate qa mare.”

<sup>25</sup> Onaqa a olo urur ti warum miliq gilsiq Herot minjej, “Ni Jon yansnjro qaji aqa gate tabirq di atsim ebe.”

<sup>26</sup> Onaqa Herot a Jon qalim moiqajqa are sosai deqa a are tulan gulbekobaiyej. Ariya aqa segi anjam tamo kalil nañgo ulatamuq di marsiq siñgilatej qaji deqa are qalsiq angro sebiñ di saidyqa uratej.

<sup>27-28</sup> Osiqa aqa qaja tamo bei qarinjosiqa minjej, “Ni gilsim Jon aqa kakro gentosim aqa gate osau.” Degsi minjnaqa a gilsiq tonto talq di Jon aqa kakro gentosiqa aqa gate tabirq di atsiqa osi bosiq angro sebiñ di yej. Yonaqa a na osi gilsiq aqa ai yej.

<sup>29</sup> Onaqa bunuqna Jon aqa angro nañgi deqa quisibqa bosib Jon aqa qusa osi gilsib subq ateb.

### *Yesus a tamo 5,000 nañgi ingi anainjrej*

<sup>30</sup> Bati bei Yesus aqa anjam maro tamo nañgi olo aqa areq di koroosib kumbra kalil nañgi yoqneb qaji deqa ti anjam kalil nañgi palontoqneb qaji deqa ti Yesus saiyoqneb.

<sup>31</sup> Bati deqa tamo ungasari tulanç gargekoba nañgi gile be eqnab Yesus aqa angro nañgi ti ingi uyqa bati saiinjrej. Deqa a na nañgi endegsi minjrej, “Ninji tigeliy. Iga tamo ungasari nañgi uratnjsim segitosim wadau sawaq di kiñala aqaratqom.”

**32** Degsi minjrsiqa aqa aŋgro naŋgi joqsiqa koba na qobuŋ gogetosib wadau sawaq gileb.

**33** Naŋgi qobuŋ na gileqnabqa tamo uŋgasari kalil naŋgi Yesus unsibqa aqa ulatamu poinjrnaqa naŋgo qure qureq na tigelosib singa na gurgurosib gilsib Yesus tiryqajqa sawaq di namoqna branteb.

**34** Onaqa Yesus a qobuŋ na gilsiq tiryosiqa njam atej di tamo uŋgasari tulan̄ gargekoba naŋgi nami tiryqa sawaq di tariŋesonab unjrej. Naŋgi kaja bul mandor saiqoji. Deqa Yesus a naŋgi qa dulosiqa Qotei aqa anjam gargekoba minjroqnej.

**35** Onaqa sen̄ aisiq bilaqttonaqa Yesus aqa aŋgro naŋgi aqa areq bosib minjeb, “O Tamo Koba, endi wadau sawa. Sen̄ aiqo. Qoloqas.

**36** Deqa ni na tamo uŋgasari naŋgi minjrimqa qure qureq gilsib dia iŋgi uysib nereŋqab.”

**37** Onaqa Yesus na minjrej, “Niŋgi na iŋgi anainjriy.” Degsi minjrnaqa naŋgi na kamba minjeb, “Iga kiyersim iŋgi anainjrqom? Iga 200 kina qabe na osimqa iŋgi awaiyosim naŋgi anainjrqom?”

**38** Onaqa Yesus na nenemnjrej, “Niŋgi iŋgi gembubunu? Niŋgi gilsib uniy.” Onaqa naŋgi gilsib unsib minjeb, “Iga bem 5 qe aiyela segi unu.”

**39** Onaqa Yesus na tamo uŋgasari kalil naŋgi minjrej, “Niŋgi qur segi segi yosibqa nīŋq di awoelenjoiy.”

**40** Onaqa naŋgi kalil dedegsib awoeb. Qudei naŋgi qur segi segi 100 awoelenjeb. Qudei naŋgi qur segi segi 50 awoelenjeb.

**41** Awoonabqa Yesus na bem 5 ti qe aiyel ti di osiqa laŋ goge tarosiq Qotei pailyej. Pailyo koboonaqa bem giŋgeŋyosiq aqa aŋgro naŋgi enj-

siqa minjrej, “Bem endi jeisib tamo uŋgasari naŋgi anainjriy.” Osiqa qe aiyel dego gingenejyosiqa aqa angro naŋgi enjrsiqa minjrej, “Qe endi dego jeisib tamo uŋgasari naŋgi anainjriy.” Degsi minjrnaqa naŋgi bem ti qe ti osi giloqnsibqa tamo uŋgasari naŋgi jeisib anainjreqnab uyoqneb.

**42** Uynab kalil menetnjrej.

**43** Onaqa ingi oto uratelenejeb qaji di Yesus aqa angro naŋgi na koroiyosib gumba kokba 12 di jignab maqeletej.

**44** Tamo kalil bem ti qe ti uyeb qaji naŋgi sisiyeb 5,000.

### *Yesus a ya baŋgaq na walwelej*

**45** Onaqa Yesus na aqa angro naŋgi endegsi minjrej, “Ninji qobun gogetosib namoosib gilsib Bet-saida qureq di tiryosib soqniy. E na tamo uŋgasari naŋgi minjritqa naŋgo qure qureq jaraiyoqnib e bqai.”

**46** Onaqa Yesus aqa angro naŋgi namoosib qobun na gileqnabqa Yesus na tamo uŋgasari naŋgi minjrnaq jaraiyeqnabqa a segi Qotei pailyqa marsiq manaq oqej.

**47-50** Oqsiq a segi mana goge di sonaqa bilaqtej. Onaqa aqa angro naŋgi qobun na gileqnabqa ya agu ambleq di jagwa koba tigelosiqa ya korkortosiqa naŋgi pulutnjrej. Nobqolo ambru Yesus a ya baŋgaq na walwelosiqa aqa angro naŋgi daurnjrsiqliq gilej. Gilsiq naŋgi jojomnjrsiqliq bunnjrqal laqnaqa ɻam ateb di Yesus a ya baŋgaq na walwelosiq naŋgoq beqnaqa unsib mareb, “Di buga beqnu.” Osib tulan ulaugetosib leleñkobaeb. Onaqa Yesus

na minjrej, “Nuŋgo are siŋgilatiy. Endi e beqnum. Ulaaib.”

**51-52** Degsi minjrsiqa qobun̄ gogetonaqa jagwa laej. Onaqa Yesus aqa aŋgro naŋgi tulan̄ prugugeteb. Di kiyaqa? Naŋgi Yesus aqa maŋwa di unsib utru geregere poinjrosai deqa. Nami Yesus na tamo 5,000 naŋgi iŋgi anainjrej maŋwa di dego aqa aŋgro naŋgi unsib poinjrosai. Naŋgo are geteŋnjresoqnej.

*Yesus a Genesaret sawaq di ma tamo gargekoba naŋgi boletnjroqnej*

**53** Ariya Yesus aqa aŋgro naŋgi koba na qobun̄ na gilsib ya agu taqal beiq di brantosib Genesaret sawaq di tiryeb.

**54-55** Tiryonabqa qure deqaji naŋgi na Yesus unsibqa aqa ulatamu poinjrnaqa gurgur ti qure qureq giloqnsibqa Yesus tiryej qaji sawa di ubtosib tamo uŋgasari naŋgi minjroqneb. Minjreqnab quoqnsib naŋgo ma tamo naŋgi saperaq di atelenqnsib qoboijoqnsib Yesus aqa areq osi beleŋeqnab a na naŋgi boletnjroqnej.

**56** A qure kiňilala ti qure kokba ti ga gamq di dego branteqnaqa tamo uŋgasari naŋgi a unoqnsibqa tamo ma ti naŋgi joqoqnsib naŋgo qure ambleq di atoqnsib endegsib minjroqneb, “O Tamo Koba, naŋgi ino gara mutu segi ojibqa naŋgo ma saioqnsas.” Onaqa Yesus a naŋgi odnjreqnaqa ma tamo kalil naŋgi aqa gara mutu ojoqneb. Ojeqnab naŋgo ma kalil kobooqnej.

### *kumbra qa ti marej*

<sup>1</sup> Onaqa Farisi naŋgi ti dal anjam qalie tamo qudei ti naŋgi Jerusalem dena bosibqa Yesus aqa areq di koroeb.

<sup>2</sup> Koroosib ḥam ateb di Yesus aqa angro qudei naŋgi baŋ yansosaisosib laŋa iŋgi uyeqnab unjreb.

<sup>3</sup> Farisi naŋgo kumbra agiende. Bati gaigai naŋgi iŋgi uyqa oqnsib mati baŋ yanseqnub. Naŋgi baŋ yansqasai di naŋgi iŋgi uyqasai. Juda kalil naŋgi kumbra degyeqnub. Di naŋgo moma naŋgo kumbra dauryeqnub.

<sup>4</sup> Naŋgi iŋgi qariŋyo sawaq dena boqnsibqa iŋgi uyqa oqnsib mati naŋgo jejamu geregere yanseqnub. Naŋgi naŋgo jejamu yansqasai di naŋgi iŋgi uyqasai. Naŋgi kumbra deqaji gargekoba yeqnub. Naŋgo ya gambaŋ, ya nobu, web dego mati geregere yanseleŋoqnsib iŋgi uyeqnub. Kumbra di naŋgo moma naŋgoq dena eleŋosib dauryeqnub.

<sup>5</sup> Deqa bati di Farisi naŋgi ti dal anjam qalie tamo naŋgi ti Yesus nenemyeb, “Ino angro naŋgi kiyaqa gago moma naŋgo kumbra gotraŋyeqnub? Agi naŋgi iŋgi uyqa oqnsib mati baŋ yansosaisosib laŋa uyeqnub.”

<sup>6</sup> Onaqa Yesus na kamba minjrej, “Ninji gisan tamo. Ninji anjam maro aiyelteqnub. Qotei aqa medabu o qaji tamo Aisaia a kere ninji qa anjam endegsi neŋgreŋyej, ‘Tamo naŋgi di naŋgo medabu na ijo ñam soqteqnub. Ariya naŋgo are miligi e qa sosai. Isaq di unu.

<sup>7</sup> Naŋgi laŋa babaŋ na e qa loueqnub. Osib mandam tamo naŋgo dal anjam palontoqnsib olo

beltinqnsib mareqnub, “Anjam endi Qotei aqa anjam.”

<sup>8</sup> Aisaia a anjam degsi neñgreñyej. Aqa anjam di bole. Agi niñgi Qotei aqa dal anjam gotrañyoqnsibqa olo mandam tamo nañgo dal anjam dauryqajqa tulaj siñgilaeqnub.”

<sup>9</sup> Yesus na Farisi nañgi anjam degsi minjrsiqa olo minjrej, “Niñgi Qotei aqa dal anjam gotrañyoqnsibqa olo nuñgo segi moma nañgo kumbra dauryeqnub.”

<sup>10</sup> Moses a marej, ‘Ni ino ai abu nañgo sorgomq di geregere sosimqa nañgo anjam dauryogne. Tamo bei na aqa ai abu nañgi misiliñnjrimqa a qalib moiym.’ Moses a degsi marej.

<sup>11</sup> Ariya niñgi mareqnub, ‘Tamo bei aqa ai kiyo aqa abu kiyo ingi qa truquamqa a na minjcas, “Ijo ingi ingi ejenum endi e ni emqa kere. Eo. E ni emqasai. E nami Qotei atraiyqa giltem deqa e ni aqaryaimqasai.”’

<sup>12</sup> A degsi minjcas di niñgi marqab, ‘A keretqo. A na aqa ai abu nañgi aqaryainjraiq.’ Niñgi degsib marqab.

<sup>13</sup> Nuñgo kumbra dena niñgi Qotei aqa anjam gotrañyoqnsibqa olo nuñgo segi moma nañgo kumbra dauryeqnub. Niñgi kumbra deqaji gargekoba yeqnub.”

### *Ingi kiye na tamo a jiga yeqnu?*

<sup>14</sup> Yesus a Farisi nañgi anjam degsi minjrsiqa olo tamo uñgasari kalil nañgi metnjrnaqa aqa areq bonabqa minjrej, “Niñgi kalil ijo anjam endi geregere quisib poiñgem.

**15** Tamo bei a ingi uyimqa aqa miliq aqas dena tamo jiga yqasai. Ingi uge uge tamo aqa miliq na oqoqnsiq branteqnu qaji dena tamo jiga yeqnu.

**16** Tamo a dabkala ti sqas di a ijo anjam endi geregere quem.”

**17** Yesus na tamo ungasari naŋgi anjam degsi minjrsiq koboonaqa a naŋgi uratnjrsiqa tal miliq gilej. A tal miliq gilsiq di sonaqa aqa angro naŋgi na aqa yawo anjam di aqa utru qa nenemyeb.

**18-19** Nenemyonabqa minjrej, “Ninji dego ijo yawo anjam di aqa utru poingosai e? Ninji quiy. Tamo naŋgi ingi uyeqnabqa aisiq meneq di unu. Meneq dena bi talq di waiyeqnub. Ingi di tamo aqa are miliq aiyosai. Aqa bi aniq aiqo koboqo. Deqa ingi dena tamo jiga yqa kerasai.” Yesus aqa anjam dena a ingi uyo kalil jiga saiqoji qa marej.

**20** Osiqa aqa angro naŋgi olo minjrej, “Ingi uge uge tamo aqa miliq na oqoqnsiq branteqnu qaji dena tamo jiga yeqnu.

**21** Di kiyaqa? Ingi uge uge di tamo aqa are miliq na branteqnu. Ingi uge uge di agi ubtosiy merŋgwai. Areqalo uge uge, uŋa qa laoqa, baŋŋoqa, tamo qaloqa,

**22** was aqa ɻauŋ anjamyoqa, was aqa ñoro qa maulyoqa, kumbra uge uge yoqa, gisanjoqa, lanja lanja laoqa, was qa ugeoqa, was yomuiyoqa, aqa segi ñam soqtoqa, nanari kumbra yoqa.

**23** Kumbra uge uge deqaji tamo aqa are miliq na brantoqnsiq dena tamo jiga yeqnu.”

*Fonisia qure qaji uŋa a Yesus qa aqa areqalo sinjilatej*

**24** Onaqa Yesus a dena tigelosiqa walwelosiq Tair qure naŋgo sawaq gilej. Tamo naŋgi a qa qalieaib deqa a uliosiq gilej. Gilsiq tal bei gogetosiq sosiq a uliesqa keresai. Tamo qudei naŋgi a unsib mareb, “Yesus a gago sawaq bqo. A talq di unu.”

**25** Degtisib marnabqa uŋa bei a quasiqa aqa aŋgro sebiŋ a mondor uge ti soqnej deqa a Yesus aqa talq giloqujatosiq aqa areq di siŋga pulutej.

**26** Uŋa di a Grik qaji. A Juda uŋa sai. A Siria sawaq di ɿambabej. A Fonisia qure qaji. A Yesus aqa areq di siŋga pulutosiq a wainyoqnsiqa minjonej, “Ni na mondor uge di wiylimqa a ijo aŋgro uratosim ulaŋqas.”

**27** Onaqa Yesus na minjej, “Iga aŋgro du du naŋgi mati iŋgi anainjrim uyib menetnjqras di kumbra bole. Iga aŋgro du du naŋgi iŋgi yainjrsim olo bauŋ naŋgi anainjrqom di kumbra bolesai.”

**28** Onaqa uŋa dena olo Yesus minjej, “O Tamo Koba, ni kere maronum. Ariya e kamba anjam bei mermit ni que. Aŋgro du du naŋgi iŋgi uyeqnabqa iŋgi ſeŋgi ululonjeqnaqa bauŋ naŋgi dego uyeqnub.”

**29** Onaqa Yesus na minjej, “O uŋa, ni kere maronum. Ni degsi maronum deqa ni gilime. Mondor uge a ino aŋgro uratosiq ulaŋqo.”

**30** Degsi minjnaqa a aqa talq gilsiq ɿam atej di mondor uge a nami aqa aŋgro uratonaqa a bijalq di ɿeiesonaq unej.

*Tamo bei dabkala geteŋo meŋ siŋgilaej qaji di  
Yesus na boletej*

**31** Onaqa Yesus a Tair qure nañgo sawa uratosiqa Saidon qure ambleq na walwelosiqa Dekapolis sawaq gilsiqa Galili ya aguq di brantej.

**32** Di brantosiq sonaqa tamo qudei na tamo bei dabkala geteñjo meñ singilaej qaji a osi bosibqa Yesus pailiyosib minjeb, “O Tamo Koba, ni ino ban aqa gateq di atimqa a boleqas.”

**33** Onaqa Yesus a tamo di osiqa tamo uñgasari nañgi uratnjrsiq a segi sosiqa aqa ban gei aiyel tamo di aqa dabkalaq jigej. Jigsiqa aqa segi maul osiqa tamo di aqa meñ tonjetej.

**34** Osiqa lañ tarosiqa are tulañ gulbekobaiyon-aqa jagwa titosiq marej, “Efata.” Di Hibru anjam. Anjam di aqa damu, “Dabkala waqeme.”

**35** A degsi marnaqa tamo di aqa dabkala waqej. Aqa meñ dego boleej. Boleonaqa a anjam bole maroqnej.

**36** Onaqa Yesus na tamo uñgasari nañgi endegsi minjrej, “Niñgi kumbra unionub endi tamo qudei nañgi ubtosib minjraib.” Degsi minjrnaqa nañgi aqa anjam di quetosai. Nañgi giloqnsibqa Yesus aña mañwa deqa mare mare laqneb.

**37** Mare mare laqnabqa tamo gargekoba nañgi quoqnsib tulañ prugoqnsib maroqneb, “Mañwa kalil Yesus a yeqnu qaji di a geregere yeqnu. Agi a na tamo dabkala geteñnjro qaji nañgi boletnjre-qnaqa nañgo dabkala olo waqeinqnaqa nañgi anjam queqnub. Tamо meñ singilainjro qaji nañgi dego gereinjreqnaqa nañgi anjam bole mareqnub.”

## 8

*Yesus a tamo 4,000 nañgi iñgi anainjrej*

**1** Onaqa bati bei Yesus a wadau sawaq di sonaqa tamo uñgasari tulan̄ gargekoba nañgi olo aqa areq di korooqneb. Nañgi iñgi saiqoji. Deqa Yesus na aqa añgro nañgi metnjrnaqa aqa areq bonabqa minjrej,

**2** “Tamo uñgasari nañgi bati qalub e koba na soqneb nañgi iñgi saiqoji. Deqa e nañgi qa are ugeibqo.

**3** Nañgi qudei isaq na beb. Deqa e nañgi mam ti suweinjritqa gamq di nañgi mam na lao uge.”

**4** Degsi minjrnaqa nañgi na kamba minjeb, “Sawa endi wadau. Deqa iga qabe na iñgi osimqa tamo uñgasari gargekoba endi anainjronam kerekas?”

**5** Onaqa Yesus na minjrej, “Ningi bem gembub unu?” Onaqa minjeb, “Bem 7 unu.”

**6** Onaqa Yesus na tamo uñgasari nañgi minjrej, “Ningi kalil mandamq di awoeleñjoiy.” Degsi minjrnaqa nañgi kalil mandamq di awoonabqa Yesus na bem 7 di osiqa Qotei pailyej. Pailyosiqa bem giñgenyosiqa aqa añgro nañgi enjreqnaqa nañgi na osi giloqnsibqa tamo uñgasari nañgi anainjreqnab uyoqneb.

**7** Qe kiñilala qudei dego soqneb. Deqa Yesus na qe di osiqa Qotei pailyosiqa aqa añgro nañgi minjrej, “Qe endi dego tamo uñgasari nañgi anainjriy.” Degsi minjrnaqa nañgi na qe di osib tamo uñgasari nañgi jeisib anainjreqnab uyoqneb.

**8** Uynab kalil menetnjrej. Onaqa iñgi oto uratelenjeb qaji di Yesus aqa añgro nañgi na kroiyosib gumba kokba 7 di jignab maqeleñej.

**9** Tamo kalil iñgi uyeb qaji nañgi sisiyeb 4,000.

Onaqa Yesus na tamo uŋgasari kalil naŋgi suweinjrnaqa naŋgo qure qureq giloqneb.

<sup>10</sup> Naŋgi gileqnabqa Yesus na aqa aŋgro naŋgi olo joqsiqa koba na qobuŋ gogetosib Dalmanuta sawaq gileb.

*Farisi naŋgi Qotei aqa maŋwa bei unqajqa mareb*

<sup>11</sup> Onaqa Farisi naŋgi Yesus aqa areq bosibqa a anjam bei grotimqa qusib a ojqajqa deqa a ombla anjam na qoteb. Osib gisaŋyosib minjeb, “Ni Qotei aqa maŋwa bei babtim iga unqom.”

<sup>12</sup> Degtisib Yesus minjnabqa a naŋgi qa are tulaŋ gulbeiyonaqa jagwa titosiqa minjrej, “Ninji tamo uŋgasari bini bati endeqa unub qaji kiyaqa e Qotei aqa maŋwa bei laŋa babtit niŋgi unqajqa metbeqnub? Niŋgi quiy. E Qotei aqa maŋwa bei niŋgi osorŋwasai.”

<sup>13</sup> Yesus a Farisi naŋgi degsi minjrsiqa naŋgi uratnjsiqa olo qobuŋ gogetosiqa ya agu taqal beiq gilej.

*Bem tiyeqnu qaji sum qa yawo anjam*

<sup>14</sup> Bati deqa Yesus aqa aŋgro naŋgi bem oqajqa are walnrej. Bem qujai bole qujai qobuŋ miliqiq di soqnej.

<sup>15</sup> Onaqa Yesus a yawo anjam bei endegsi minjrej, “Niŋgi geregere ɣam atsib soqniy. Bem tiyeqnu qaji sum Farisi naŋgo bem ti bulyimqa bem dena tiyekritosim tulaŋ kobaqujaqas. Herot aqa bem dego tiyekritosim tulaŋ kobaqujaqas.”

<sup>16</sup> Onaqa Yesus aqa aŋgro naŋgi aqa yawo anjam di qusibqa segi segi maroqneb, “Iga bem osai deqa kiyo mergwo?”

**17** Onaqa Yesus a nango anjam di qalieosiqa nenemnjrej, “Ninji kiyaqa bem osai deqa mareqnub? Kiyaqa ninji e qa poingosai unu? Nunjo are getengejunu kiyo?

**18** Ninji ijo singila unoqnsib unosaibuleqnub. Ninji ijo anjam quoqnsib quosaibuleqnub.

**19** E nami bem 5 giŋgenyosimqa tamo 5,000 anainjronam uynab menetnrnaqa ninji ingi oto koroiyosib gumba kokba gembub jignab maqeļej?” Onaqa naŋgi na Yesus minjeb, “Gumba 12.”

**20** Onaqa olo minjrej, “Bati bei e bem 7 dego giŋgenyosimqa tamo 4,000 anainjronam uynab menetnrnaqa ninji ingi oto koroiyosib gumba kokba gembub jignab maqeļej?” Onaqa minjeb, “Gumba 7.”

**21** Onaqa minjrej, “Ninji kiyaqa e qa poingosai unu?”

### *Yesus a tamo ɻam qandimyej qaji boletej*

**22** Yesus na aqa angro naŋgi degsi minjrsiqa koba na qobun na gilsib Betsaida qureq di tiryeb. Tiryosib mandamq ainabqa tamo qudei na tamo bei ɻam qandimyej qaji a Yesus aqa areq osi bosib minjeb, “Ni ino baŋ aqa gateq di atimqa a olo boleosim ɻam poiqas.”

**23** Onaqa Yesus a tamo di aqa baŋ ojsiqa qure polomq osi gilsiqa aqa ɻamdamuq di misel atetej. Osiqa aqa gateq di aqa baŋ atsiqa nenemyej, “Ni sawa unqa kere e?”

**24** Onaqa a ɻam atsiqa marej, “E tamo nangi unjronum naŋgi ɻamtaŋ bul anŋileqnub.”

**25** Onaqa Yesus a olo tamo di aqa ɳamdamuq di aqa banj atnaqa a ɳam atej ɳamdamu bole suwanjej. A sawa kalil geregere unej.

**26** Onaqa Yesus na minjej, “Ni ino talq gilime. Ni qure miliqi q gilaim.”

### *Pita a Yesus qa poiyonaqa aqa ɳam ubtej*

**27** Onaqa Yesus na aqa anjro naŋgi olo joqsiqa koba na walwelosib Sisaria Filipai qure naŋgo sawaq di brantosib gamq di Yesus na aqa anjro naŋgi endegsi nenemnjrej, “Tamo uŋgasari naŋgi e qa kiyersib mareqnub?”

**28** Onaqa naŋgi na minjeb, “Tamo qudei naŋgi mareqnub, ni Jon yansnjro qaji. Qudei naŋgi mareqnub, ni Elaija. Qudei naŋgi mareqnub, ni Qotei aqa medabu o tamo naŋgi nami soqneb deqaji bei.”

**29** Onaqa Yesus na olo nenemnjrej, “Niŋgi segi e qa kiyersib mareqnub?” Onaqa Pita na minjej, “Ni Kristus.”

**30** Pita a anjam degsi ubtonaqa Yesus na aqa anjro naŋgi singila na getentnjsiqa minjrej, “Niŋgi anjam di olo tamo qudei minjraib.”

### *Yesus a marej, “E moisiy olo subq na tigelqai”*

**31** Osiqa Yesus na aqa anjro naŋgi endegsi minjrej, “E Tam Anjro. Bunuqna e jaqatiŋ koba oqai. Juda gate naŋgi ti atra tamo kokba ti dal anjam qalie tamo naŋgi ti e qoreibosib lubsib moirotbqab. Bati qalub koboamqa e olo subq na tigelqai.”

**32** Yesus a anjam degsi ubtosiq marnaqa Pita na Yesus osiqa qalaq gilsiqa ɳirinjej.

**33** Onaqa Yesus a bulosiqa aqa aŋgro naŋgi koqn-jrsiqa Pita ɳirin̄tosiq minjej, “Ni Satan bul. Deqa ni ijo qoreq gile. Ni Qotei aqa areqalo dauryosai. Ni mandam tamo naŋgo areqalo dauryonum. Dauryosim agi ni na anjam di merbonum.”

**34** Osiqa Yesus na tamo uŋgasari kalil naŋgi ti aqa segi aŋgro naŋgi ti metnjrnaqa aqa areq bonabqa minjrej, “Tamo bei na e daurbqa osimqa a aqa segi areqalo kalil uratekritosim aqa segi ɳamburbas qoboiyosim e daurbem.

**35** Tamo bei na aqa segi ɳambile taqatqajqa arearetqas di a padalqas. Ariya tamo bei a e qa ti ijo anjam bole qa ti are qalsimqa aqa segi ɳambile uratqas di a olo ɳambile bole oqas.

**36** Tamo bei a mandam qa ñoro kalil koroiyosim ariya mondoŋ aqa segi qunuŋ padalqas di ñoro dena a kiyersim aqaryaiyqas? Di keresai.

**37** Aqa qunuŋ padalqas di a awai kiye atsim dena aqa qunuŋ olo aqaryaiyosim a ɳambile sqas? Di keresai.

**38** E Tamo Aŋgro. Tamo uŋgasari bini bati endeqa unub qaji naŋgi Qotei torei qoreiyoqnsib une ato-qnsib laqnub. Deqa bini bati endi tamo bei a e qa ti ijo anjam qa ti jemaiyqas di mondoŋ e ijo Abu aqa riaŋ na ti aqa laŋ aŋgro naŋgo riaŋ na ti bosiyqa e kamba tamo deqa jemaibqas.”

## 9

**1** Osiqa Yesus a olo aqa aŋgro naŋgi endegsi min-jrej, “E bole mern̄gwai. Tamo qudei ijo areq endi tigelejunub qaji naŋgi moreňosaisoqniqbqa Qotei a singila ti bqas. Bosim naŋgi taqatnjsim naŋgo Mandor Koba soqnim naŋgi unqab.”

*Yesus aqa jejamu bulyonaq aqa anjro qalub nañgi unobeiteb*

<sup>2</sup> Osiqa bati 6 onaqa Yesus a tigelosiqa Pita na Jems na Jon na nañgi segi qalub joqsiqa koba na mana goge kobaq oqsib di soqneb. Sosibqa Yesus aqa jejamu bulyonaq nañgi unobeiteb.

<sup>3</sup> Aqa gara dego tulan̄ puloñosiq qatekritej. Tamo bei na gara yansqas degsim qatqa kerasai.

<sup>4-5</sup> Onaqa Moses Elaija wo nañgi brantosib Yesus koba na anjam maroqneb. Mareqnabqa Yesus aqa anjro nañgi na nañgi aiyelunjrsibqa Pita a Yesus minjej, “O Tamo Koba, Moses Elaija wo nañgi bosib iga koba na endi unum di bolequja. Deqa ni marimqa iga tal kiñilala qalub gereiyqom. Bei ino. Bei Moses aqa. Bei Elaija aqa.”

<sup>6</sup> Yesus aqa anjro nañgi tulan̄ ulaugeteb deqa Pita a anjam bei marqa saiyyonaqa anjam di laña marej.

<sup>7</sup> Onaqa lañbi aisiqa nañgi kabutnjrnaqa lañbi miligiq dena anjam bei endegsi brantonaq nañgi queb, “Endi ijo Anjro qujai e na tulan̄ qalaqlaiye-qnum qaji. Niñgi aqa anjam quetoqniy.”

<sup>8</sup> Onaqa Yesus aqa anjro nañgi bulosib ñam ateb di Yesus a segi nañgi koba na sonab uneb. Nañgi tamo bei unosai.

<sup>9</sup> Onaqa nañgi Yesus ombla manaq dena olo aiyoqnsibqa Yesus na minjrej, “Mañwa niñgi mana goge di unonub qaji di ubtosib tamo qudei minjraib. Bunuqna e Tamo Anjro moisiy olo subq na tigelotqa bati deqa niñgi na ubtosib minjroqñ-qab.”

<sup>10</sup> Onaqa nañgi Yesus aqa anjam di quisib segi maroqneb, “Yesus a kiyaqa subq na tigelqa

marqo? Anjam di aqa utru iga poigosai.” Degtib maroqnsib Yesus aqa anjam di nañgo areqaloq di atnab soqnej.

<sup>11</sup> Osib nañgi Yesus minjeb, “Dal anjam qalie tamo nañgi mareqnub, ‘Elaija a namo bamqa Kristus a bunuqna bgas.’ Anjam di kiyaqa degtib mareqnub?”

<sup>12</sup> Onaqa Yesus na minjrej, “Nañgo anjam di bole. Elaija a namo bosim tamo uñgasari kalil nañgo areqalo gereiyetnjsim soqnim bunuqna Kristus a bgas. Ariya anjam kiye neñgreñq di unu? Anjam agiende. Jeu tamo nañgi na e Tamo Añgro kumbra uge ebibqa e jaqatin koba oqai.

<sup>13</sup> E niñgi olo merñgawai. Elaija agi bej. Bonaqa gulbe kalil nañgi a yqajqa are soqnej qaji agi yeb. Anjam di nami a qa neñgreñyeb unu.”

### *Yesus a añgro mel aqa jejamuq na mondor uge wiyyetej*

<sup>14</sup> Onaqa Yesus na aqa añgro qalub nañgi di joqsiqa koba na aisib mana utruq di branteb. Brantosib ñam ateb di Yesus aqa añgro qudei nañgi ti dal anjam qalie tamo qudei ti anjam na qoteqnab unjreb. Tamo uñgasari gargekoba nañgi dego Yesus aqa añgro nañgi kaiñnjresonab unjreb.

<sup>15</sup> Onaqa tamo uñgasari kalil nañgi Yesus unsibqä tulañ prugugetosib gurgur ti aqa areq bosib minjeb, “O Tamo Koba, bilaq bole.”

<sup>16</sup> Degtib minjnabqa Yesus na aqa añgro nañgi nenemnjrej, “Niñgi nañgi ti anjam kiye na qoteqnub?”

<sup>17</sup> Onaqa tamo uñgasari nañgo ambleq dena tamo bei brantosiqa Yesus minjeb, “O Qalie Tamo,

e ijo aŋgro mel osi bonum agiende. Ni na a boletqajqa deqa osi bonum. A mondor uge ti. Deqa aqa medabu geteŋyejunu.

**18** Mondor uge dena aqa jejamu ojoqnsiqa mandamq waiyeqnaqa ara gjiriqtoqnsiqa tindaŋeqnu. Oqnsiqa maul aiyeqnu. Deqa e na ino aŋgro naŋgi minjronum, ‘Niŋgi mondor uge di wiyyi.’ Minjronumqa naŋgi na wiyyqa yonub keresaiinjrqo.”

**19** Onaqa Yesus a anjam di quisiga marej, “Niŋgi tamo uŋgasari bini bati endeqa unub qaji nuŋgo areqalo e qa siŋgilatosai bole sai. Bati gembub e niŋgi koba na sosiyqa nuŋgo gulbe di qoboiyoqnqai? Aŋgro mel di ijo areq osi boiy.”

**20** Onaqa osi bonabqa mondor uge dena Yesus unsiqa aŋgro di qunjimyonaqa a mandamq aisiqa belbelonaqa aqa medabuq na maul aiyoqnej.

**21** Onaqa Yesus na aŋgro di aqa abu nenemyej, “Bati gembub a degesoqnej?” Onaqa minjej, “A aŋgro kiňala qa degesoqnej agi bini unu.

**22** Mondor uge na a qalsim moirotqa oqnsiqa bati gaigai a ɿamyuwoq o yaq waiyeqnu. Deqa ni na iga aqaryraigwa kereamqa aqaryraig.”

**23** Onaqa Yesus na minjej, “Kereamqa’ degsi merbaim. Tamo bei a e qa aqa areqalo siŋgilatqas di a kumbra kalil yqa kere.”

**24** Onaqa tamo dena lelenjosiq Yesus minjej, “E ni qa ijo areqalo siŋgilatonum. Ariya ijo areqalo olo gulbeibeqnu. Deqa ni na aqaryuibimqa e geregere ijo areqalo ni qa siŋgilatqai.”

**25** Onaqa tamo uŋgasari gargekoba naŋgi gurgur ti bosib Yesus aqa areq di koroeqnabqa Yesus a naŋgi unjrsiqa mondor uge di ɿiriŋtosiq minjej,

“Ni mondor uge. Ni na aŋgro di aqa dabkala getentonum. Ni aqa medabu dego getentonum. Deqa ni aŋgro di uratosim olo aqa jejamuq gilaim.”

<sup>26</sup> Degsi minjnaqa mondor uge a lelenkobaosiqa aŋgro di singila na qunjimyosiqa a uratosiq ulanjej. Ulanjonaqa aŋgro di a moiyobulosiqa neiesonaqa tamo qudei naŋgi unsib mareb, “A moiqo.”

<sup>27</sup> Onaqa Yesus na aŋgro di aqa banj titonaqa a boleosiq tigelej.

<sup>28</sup> Onaqa Yesus aqa aŋgro naŋgi aqa areq lumu bosib nenemyeb, “Iga kiyaqa mondor uge di wiqqa yonumqa keresaiigwo?”

<sup>29</sup> Onaqa Yesus na minjrej, “Ninji mondor uge deqaji winjrqa osibqa Qotei pailyoqniy. Dena qujai ninji na mondor uge winjrib jaraiqab. Gam bei na sai.”

### *Yesus a marej, “E moisiy olo subq na tigelqai”*

<sup>30</sup> Onaqa Yesus na aqa aŋgro naŋgi olo joqsiqa koba na sawa di uratosib Galili sawa ambleq na walwelosib giloqneb. Tamo ungasari naŋgi a qa qalieaib deqa naŋgi uliosib giloqneb.

<sup>31</sup> Giloqnsibqa gamq di Yesus na aqa aŋgro naŋgi anjam endegsi minjrej, “E Tamо Aŋgro. Jeu tamo naŋgi na e ojsibqa tamo qudei naŋgo banq di atib lubib moiqai. Bati qalub koboamqa e olo subq na tigelqai.”

<sup>32</sup> Onaqa Yesus aqa aŋgro naŋgi aqa anjam di geregere poinjrosai. Deqa naŋgi a olo nenemyqa-jqa ulaeb.

### *Yesus aqa aŋgro yai a ñam ti sqas?*

<sup>33</sup> Onaqa Yesus aqa aŋgro naŋgi ti gilsib Kaperneam qureq di branteb. Brantosib tal bei

gogetosib di sosibqa Yesus na aqa aŋgro naŋgi endegsi nenemnjrej, “Niŋgi gamq di anjam kiye na qotoqnab?”

<sup>34</sup> Onaqa naŋgi mequmosib soqneb. Di kiyaqa? Naŋgi gamq di Yesus aqa aŋgro yai a naŋgi kalil buŋnjrsim ñiam ti sqas deqa anjam na qotoqnab.

<sup>35</sup> Onaqa Yesus a awoosiqa aqa aŋgro 12 naŋgi metnjerñaqa aqa areq bonabqa minjrej, “Tamo bei a ñam ti sqa marsimqa a mati tamo kalil naŋgo kaŋgal tamo soqnem. Osimqa a ñam ti sqas.”

<sup>36</sup> Yesus a naŋgi degsi minjrsiqa aŋgro kiñala bei osiqa naŋgo ambleq di tigeltoсиqa olo soqonyosiqa naŋgi minjrej,

<sup>37</sup> “Tamo bei a ijo ñam qa are qalsimqa aŋgro kiñala endeqaji bei osim geregereiyqas di a e dego osim geregereibqas. Tamo a e osim geregereibqas di a na e segi geregereibqasai. A na ijo Abu e qariŋbej qaji di dego osim geregereiyqas.”

*Tamo naŋgi iga jeutgosaieqnub di naŋgi iga koba na wau qujai*

<sup>38</sup> Onaqa Jon na Yesus minjej, “O Qalie Tam, ni que. Iga tamo bei unem. A ino ñam na mondor uge naŋgi winjreqnaqa iga na unsim saidyem. Di kiyaqa? A iga koba na wauosaieqnu deqa.”

<sup>39</sup> Onaqa Yesus na minjej, “Niŋgi a saidyaib. A ijo ñam na maŋwa bei babtqas di a urur olo e misiliŋbqa keresai.

<sup>40</sup> Tamo naŋgi iga jeutgosaieqnub di naŋgi iga koba na wau qujai.

<sup>41</sup> Tamo bei a endegsi are qalqas, ‘Tamo di a Kristus dauryeqnu qaji tamo.’ A degsi are qalsimqa tamo di osim ya tigsim anaiyqas di Qotei

na kamba awai bole yqas. Yimqa aqa awai bole di tamo bei na olo yaiyqa keresai.”

### *Niŋgi une torei uratiy*

**42** Osiqa Yesus a olo marej, “Tamo bei na aŋgro kiñala bei e qa aqa areqalo siŋgilateqnu qaji di osim uneq waiyqas di a kumbra tular ugedamu yqo. Iga tamo di ojsim meniŋ kobaquja osim sil na aqa kakroq di tontosim waiyim ya robuq aiqas di kere.

**43-44** Ino banj na ni titmosim uneq waimqa laqn-imqa banj di gentosim waiy. Ni degye. Di kiyaqa? Ni banj geŋo sosimqa une bei yqasai di kere. Di ni ŋambile gaigai sqam. Ariya ni banj aiyel ti sosimqa une yqam di keresai. Di Qotei na ni ŋamyuwoq waimqas. ɬamyuwo di mosoqasai. Gaigai yuoqnqas.

**45-46** Ino singa na ni titmosim uneq waimqa laqn-imqa singa di gentosim waiy. Ni degye. Di kiyaqa? Ni singa geŋo sosimqa une bei yqasai di kere. Di ni ŋambile gaigai sqam. Ariya ni singa aiyel ti sosimqa une yqam di keresai. Di Qotei na ni ɬamyuwoq waimqas.

**47** Ino ɬamdamu na ni titmosim uneq waimqa laqnimqa ɬamdamu di otorosim waiy. Ni degye. Di kiyaqa? Ni ɬamdamu qujai ti sosimqa une bei yqasai di kere. Di Qotei a ino Mandor Koba sosim ni taqatmzas. Ariya ni ɬamdamu aiyel ti sosimqa une yqam di keresai. Di Qotei na ni ɬamyuwoq waimqas.

**48** ɬamyuwo di mosoqasai. Gaigai yuoqnqas. ɬamyuwoq di tamo naŋgo ambli bati gaigai sqab. Naŋgi moreŋqa keresai.”

**49** Osiqa Yesus a olo marej, “Ijo angro kalil naŋgi jaqatinj oqnsib sqab. Atraiyo iŋgiq di bar atoqnsib ɻamyuwu na koiteqnub dego kere.

**50** “Bar a bole. A qajarara koba. Ariya bar aqa qajarara koboqas di iŋgi kiye na olo qajararatqas? Di keresai. Dego kere ningi bar bul sosibqa nuŋgo was naŋgi koba na geregere lawo na laqniy.”

## 10

### *Yesus a uŋa uratqajqa anjam marej*

**1** Osiqa Yesus a sawa di uratosiqa Judia sawaq gilsiq Jordan ya taqal beiq di soqnej. A di son-aqa tamo uŋgasari gargekoba naŋgi bosib aqaq di koroonabqa aqa kumbra gaigai yoqnej qaji di olo dauryosiqa Qotei aqa anjam plaltosiq minjroqnej.

**2** Onaqa Farisi naŋgi olo Yesus aqa areq bosibqa a anjam bei grotimqa quisib naŋgi a ojqajqa deqa lanja gisanjosib endegsib nenemyeb, “Tamo bei na aqa uŋa uratqa kere e? Gago dal anjam degsi unu e?”

**3** Onaqa Yesus na kamba minjrej, “Moses a dal anjam kiyersi marej?”

**4** Onaqa naŋgi na minjeb, “Moses a marej, ‘Tamo bei na aqa ɻauŋ uratqa osimqa pepa bei neŋgreŋjosim yosim di a uratqas.’”

**5** Onaqa Yesus na minjrej, “Nuŋgo are geteŋgejunu deqa Moses a dal anjam degsi neŋgreŋjosiq ningi eŋgej.

**6** Ariya ningi quiy. ‘Tulaŋ nami Qotei a mandam ti iŋgi iŋgi kalil ti gereiyosiqa a tamo uŋa wo dego gereinjrej.

**7-8** Deqa tamo bei na aqa ai abu naŋgi uratnjr-simqa aqa ɻauŋ wo beterosib jejamu qujaitosib sqab.' Qotei aqa anjam di neŋgrenq di unu. Deqa tamo uŋa wo naŋgi jejamu qujai sqab. Naŋgi olo jejamu aiyel sqasai.

**9** Qotei na naŋgi aiyel turtnjrej deqa tamo bei na olo potnjraiq."

**10** Osiqa Yesus a tal bei gogetosiq di sonaqa aqa aŋgro naŋgi aqa areq bosib aqa anjam deqa nenemyeb.

**11** Nenemyonabqa minjrej, "Tamo bei na aqa ɻauŋ uratosim olo uŋa bei oqas di a na aqa ɻauŋ kumbra ugeq waiyqo.

**12** Uŋa a dego aqa gumbuluŋ uratosimqa olo tamo bei oqas di a na aqa gumbuluŋ kumbra ugeq waiyqo."

### *Aŋgro du du naŋgi Yesus aqa areq beb*

**13** Onaqa tamo uŋgasari qudei naŋgi naŋgo aŋgro du du joqsib Yesus na aqa baŋ naŋgo gateq di atet-njrqa marsib Yesus aqa areq beb. Beqnabqa Yesus aqa aŋgro naŋgi na saidnjrsib minjreb, "Nuŋgo aŋgro du du naŋgi joqsib endeq baib."

**14** Degsib saidnjrnabqa Yesus na aqa aŋgro naŋgi ɻirinjnrjsiqa minjrej, "Aŋgro du du naŋgi uratnjb ijo areq beb. Naŋgi saidnjraib. Tamо uŋgasari naŋgi aŋgro du du deqaji bul sqab di Qotei a naŋgo Mandor Koba sosim naŋgi taqatnjqras.

**15** E bole merŋgwai. Tamо naŋgi aŋgro du du bul sqasai di Qotei na naŋgi osim taqatnjqrasai. Deqa a naŋgo Mandor Koba sqasai dego."

**16** Osiqa Yesus na aŋgro du du naŋgi di soqonjrsiqa aqa baŋ naŋgo gateq di atetnjrsiqa naŋgi qa Qotei pailyej.

*Ñoro tamo bei a Yesus ombla anjam mareb*

**17** Osiqa Yesus a dena tigelosiqa gam dauryosiq gileqnaqa tamo bei urur ti aqa areq bosiq aqa singaq di singa pulutosiqa nenemyej, “O Qalie Tamo Bole, e kumbra bole kiye dauryosiy dena e ñambile gaigai sqai?”

**18** Onaqa Yesus na kamba minjej, “Ni kiyaqa e tamo bole qa merbonum? Qotei a segi qujai tamo bole.

**19** Ariya ni Qotei aqa dal anjam qalie. Anjam agiende. ‘Ni tamo bei qalsim moiyyotaim. Ni tamo bei aqa unja jejamu ojetaim. Ni bajinjaim. Ni tamo bei aqa jejamu laŋa gisanjyaim. Ni was bei aqa ingi ingi laŋa gisanj na yaiyaim. Ni ino ai abu naŋgo sorgomq di geregere sosimqa naŋgo anjam dauryoqne.’ ”

**20** Onaqa tamo dena olo Yesus minjej, “O Qalie Tamo, e aŋgro kiñala qa dal anjam kalil di dauryosim boqnem agi bini degsi unum.”

**21** Onaqa Yesus a tamo di koqyosiqa qalaiyosiq minjej, “Ni dal anjam kalil di dauryosim kertonum. Ariya kumbra qujai ni keretosai. Deqa e ni mermqai. Ni gilsim ino ingi ingi kalil qariyyosim silali osim tamo ingi ingi saiqoji naŋgi jeisim enjre. Degsim enjrsim bosim e daurbe. Yimqa bunuqna ni laŋ qureq di awai bole itqam.”

**22** Yesus na tamo di degsi minjnaq qusiqa are tulan̄ gulbekobaiyej. A ingi ingi koba ti soqnej deqa ulatamu ugeiyonaqa ulaŋej.

**23** Onaqa Yesus na aqa aŋgro naŋgi koqnjrsiqa endegsi minjrej, “Tamo uŋgasari iŋgi iŋgi koba ti unub qaji naŋgi Qotei na taqatnjsim naŋgo Mandor Koba sqa marsibqa laŋ qureq oqwaŋqa baŋgi koba.”

**24** Onaqa Yesus aqa aŋgro naŋgi aqa anjam di quisibqa tulanŋ prugeb. Onaqa Yesus na olo minjrej, “O ijo aŋgro, niŋgi quiy. Tamo uŋgasari naŋgi Qotei na taqatnjsim naŋgo Mandor Koba sqa marsibqa laŋ qureq oqwaŋqa tulanŋ baŋgi koba.

**25** Kamel a yumba miliq gilqajqa baŋgi koba. Dego kere tamo uŋgasari iŋgi iŋgi koba ti unub qaji naŋgi Qotei na taqatnjsim naŋgo Mandor Koba sqa marsibqa laŋ qureq oqwaŋqa tulanŋ baŋgi koba.”

**26** Onaqa Yesus aqa aŋgro naŋgi aqa anjam di quisibqa olo tulanŋ prugugetosib segi segi maroqneb, “Yesus a anjam degsi mergwo deqa tamo yai naŋgi Qotei na eleŋjamqa naŋgi ɣambile gaigai sqa kere?”

**27** Onaqa Yesus a naŋgi koqnjrsiqa minjrej, “Tamo naŋgi segi ɣambile sqa keresai. Ariya Qotei na naŋgi eleŋqa kere. Di kiyaqa? Qotei a kumbra kalil yqa kere.”

**28** Onaqa Pita na Yesus minjej, “O Tamko Koba, ni une. Iga gago iŋgi iŋgi kalil uratosim ni daurmeqnum.”

**29-30** Onaqa Yesus na minjrej, “E bole mernŋwai. Tamko naŋgi e qa ti ijo anjam bole qa ti are qaloqnsib naŋgo segi tal, naŋgo was naŋgi, naŋgo jaja naŋgi, naŋgo ai abu naŋgi, naŋgo aŋgro naŋgi ti naŋgo wau kalil dego uratnjsib e daurbqab di Qotei na olo tal, was, jaja, ai, aŋgro, wau gargekoba

naŋgi enjrqas. Yimqa jeu tamo naŋgi dego bosib naŋgi gulbe enjroqnqab. Ariya mondonj naŋgi ɻambile gaigai sqab.

<sup>31</sup> Deqa niŋgi quiy. Tamo gargekoba bini ñam koba ti unub qaji naŋgi mondonj ñam saiqoji sqab. Ariya tamo gargekoba bini ñam saiqoji unub qaji naŋgi mondonj ñam koba ti sqab.”

*Yesus a marej, “E moisiy olo subq na tigelqai”*

<sup>32</sup> Osiqa Yesus na aqa aŋgro naŋgi joqsiqa koba na gam dauryosib Jerusalem aiyoqneb. Aiyoqnsibqa Yesus a namoeqnaqa aqa aŋgro naŋgi bunuqna dauryoqnsibqa are toŋtoŋnjroqnej. Tamo ungasari qudei gam na dauryoqneb qaji naŋgi dego ulaosib aiyoqneb. Onaqa Yesus na aqa aŋgro 12 naŋgi segitnjsiqa a une kiye turqas deqa naŋgi sainjroqnej.

<sup>33-34</sup> A na naŋgi endegsi minjrej, “Niŋgi quiy. E Tamo Aŋgro. Iga Jerusalem aiyeqnum. Dia tamo qudei na e ojsib dal anjam qalie tamo naŋgi ti atra tamo kokba ti naŋgo baŋq di e atqab. Yimqa naŋgi na ijo jejamu laŋa gisanjosib merbqab, ‘Ni une ti. Deqa ni moiqam.’ Naŋgi e degsib gisanbosit e olo ojsib tamo naŋgi Qotei qaliesai qaji naŋgo baŋq di e atqab. Yimqa naŋgi na e misiliŋboqnsib miselboqnsib bu toqonj na e kumbaiŋboqnsib. Osib e ɻamburbasq di lubsib moirotbqab. Bati qalub koboamqa e olo subq na tigelqai.”

*Jems Jon wo naŋgi aiyel tamo kokba sqajqa mareb*

<sup>35</sup> Onaqa Sebedi aqa ɻiri aiyel Jems Jon wo naŋgi Yesus aqa areq bosib minjeb, “O Qalie Tam, aqo

aiyel anjam bei mermonam ni gago anjam dauryqa kere kiyo?”

<sup>36</sup> Onaqa Yesus na naŋgi aiyel nenemnjrej, “E niŋgi kiyerŋwajqa deqa niŋgi ijoq bonub?”

<sup>37</sup> Onaqa naŋgi aiyel na Yesus minjeb, “Mondon ni riaŋ koba ti laŋ goge na bosim gago Mandor Koba sosimqa batı deqa ni marimqa aqo aiyel ino baŋ woq ino baŋ qonaŋq di awoqom.”

<sup>38</sup> Onaqa Yesus na kamba minjrej, “Anjam niŋgi merbonub di aqa utru niŋgi geregere poiŋgosai. E jaqatinj koba oqai. Jaqatinj di ya uge uyo bul. E gulbe koba dego oqai. Gulbe di tamo naŋgi ya tuqtnjro bul. Jaqatinj ti gulbe ti e oqai di niŋgi aiyel dego oqa kere e?”

<sup>39</sup> Onaqa naŋgi na minjeb, “Od, aqo aiyel oqa kere.”

Onaqa Yesus na olo naŋgi aiyel minjrej, “Bole, jaqatinj e oqai di niŋgi dego oqab. Gulbe e oqai di niŋgi dego oqab.

<sup>40</sup> Ariya tamo yai naŋgi ijo baŋ woq ijo baŋ qonaŋq di awoqab di e na marqa keresai. Di ijo wau sai. Tamo naŋgi Qotei na giltnjrej qaji naŋgi segi ijo baŋ woq ijo baŋ qonaŋq di awoqab.”

<sup>41</sup> Yesus aqa aŋgro 10 naŋgo ɻamdamuq di Jems Jon wo naŋgi na anjam di Yesus minjeb deqa quisib naŋgi aiyel qa ɻiriŋeb.

<sup>42</sup> Onaqa Yesus na aqa aŋgro 10 naŋgi met-njrnaga aqa areq bonabqa minjrej, “Niŋgi qalie, mandor kokba sawa sawa kalil taqateqnub qaji naŋgi nango segi ñam soqtoqnsib tamo uŋgasari naŋgi ɻiriŋ na taqatnjreqnub.

**43** Ariya kumbra di nunjgoq di saiq. Nunjo ambleq di angro bei a ñam ti sqa marsimqa a mati nunjo wau tamo soqnem. Osim a ñam ti sqas.

**44** Nunjo ambleq di angro bei a tamo kobaquja sqa marsimqa a mati nunjo kañgal tamo soqnem. Osimqa a olo tamo kobaqujaqas.

**45** E Tamo Anđro. Ningi ijo kumbra qalieosib degsib dauryoqniy. Ijo kumbra agiende. E na tamo ungasari nañgi wauetnjreqnum. E deqa bem. Tamo ungasari nañgi e wauetbqajqa e deqa bosai. Bunuqna e ijo segi ñambile uratosiy tamo ungasari garkekoba nañgi eleñqai.”

### *Yesus na tamo ñam qandimo boletej*

**46** Osiqa Yesus na aqa angro nañgi joqsiqa koba na walwelosib aisib Jeriko qureq di branteb. Brantosib Jeriko qure ambleq na walwelosib olo Jeriko uratosib aiyeqnabqa tamo ungasari tulan̄ gargekoba nañgi Yesus dauryosib koba na aiyoqneb. Aiyeqnabqa tamo bei ñam qandimyej qaji aqa ñam Bartimeus a gam qalaq di awesosiqa tamo ungasari nañgi silali qa ñilnijroqnej. Bartimeus a Timeus aqa ñiri.

**47** A gam qalaq di awesosiqa anjam endegsi quej, “Yesus Nasaret qaji a beqnu.” A degsi quisiga tulan̄ lelenjosiq marej, “O Yesus, Devit aqa Ñiri, ni e qa dulame.”

**48** Onaqa tamo ungasari gargekoba Yesus dauryosib aiyoqneb qaji nañgi na Bartimeus ñirintosib minjeb, “Ni lelenkobaaim. Kiri.” Degrise minjeqnabqa a nañgo anjam quetnjrosai. A olo tulan̄ lelenjosiq Yesus minjoqnej, “O Devit aqa Ñiri, ni e qa dulame.”

**49** Onaqa Yesus a tigelosiqa tamo uŋgasari naŋgi minjrej, “Tamo di metib ijo areq bem.” Onaqa naŋgi na tamo ŋam qandimyej qaji di metosib minjeb, “Ni are singilat. Ni tigel. Yesus a ni metmeqnu.”

**50** Degtib minjnab quisiga aqa gara jugo taqal atsiqa urur tigelosiqa Yesus aqa areq bej.

**51** Bonaqa Yesus na nenemyej, “E ni kiyermqajqa deqa ni e qa lelenjoqnam?” Onaqa minjej, “O Tamo Koba, e olo ŋam poibim sawa unqajqa deqa e ni qa lelenjoqnam.”

**52** Onaqa Yesus na minjej, “Ni e qa ino areqalo singilatonum deqa e ni bolelmqai. Deqa ino ŋamdamu olo poimimqa ni aiye.” Degsi minjnaqa aqa ŋamdamu poiyyonaqa sawa unsiqa tigelosiq Yesus dauryosiq aiyej.

## 11

*Yesus a donki aqa quraq di awoosiq Jerusalem aiyej*

**1** Onaqa Yesus aqa angro naŋgi koba na wal-welosib aisib Jerusalem jojomyosib Bettage qure ti Betani qure ti dia branteb. Qure aiyel di agi Oliv mana utruq di unu. Di brantosib Yesus na aqa angro aiyel qariŋjrsiqa minjrej,

**2** “Niŋgi aisib qure bei jojom di unu di brantosib donki bei tontonub unu di unqab. Donki di bunuj tamo bei nami aqa quraq di awoosaiqnej qaji. Niŋgi donki di unsib sil palontosib titosib osi boiy.

**3** Niŋgi sil palontoqniqbqa tamo bei na nenemŋgas kiyo, ‘Niŋgi kiyaqa donki aqa sil palonte-qnub?’ Degsi nenemŋgimqa niŋgi na minjiy, ‘Tamo

Koba a wau ti deqa donki qa mergwo.' Yimqa a na donki qarinjyim ijoq bkas."

**4-5** Yesus a naŋgi aiyel degsi minjrsiq qarinjrnqa aisib gam jojomq di donki uneb. Donki di tal meq di tontonab sonaq uneb. Unsib sil palonteqnabqa tamo qudei gamq di tigelesoqneb qaji naŋgi na naŋgi aiyel nenemnjreb, "Ninji kiyaqa donki aqa sil palonteqnub?"

**6** Onaqa naŋgi aiyel na anjam Yesus a minjrej qaji di tamo naŋgi di minjrnab odnjrnbabqa donki di osib Yesus aqa areq osi beb.

**7** Bosib naŋgo aiyel gara jugo piqtosib donki aqa quraq di tunabqa Yesus a segi donki gogetosiqa quraq di awoej.

**8** Awoonaqa donki a walwelosi aiyeqnaqa tamo uŋgasari gargekoba naŋgi beleŋosib naŋgo segi gara jugo piqtelenjosib gamq di tuelenjoqneb. Tamo qudei naŋgi naňuq dena ñam banya ginjeŋyosibqa osi bosib di dego gamq di tuelenjoqneb.

**9** Onaqa Yesus a donki quraq di awoosiq walweleqnaqa tamo uŋgasari namooqneb qaji naŋgi ti bunuoqneb qaji naŋgi ti tulan lelenjoqnsibqa maroqneb, "Iga ni qa tulan areboleboleigeqnu. Ni Tamo Koba aqa ñam na bonum deqa a ni tulan geregereimeqnu.

**10** Ni gago moma Devit aqa wau osimqa ni kamba gago Mandor Koba sosim iga taqatgwajqa bonum. Deqa iga Qotei laŋ goge di unu qaji aqa ñam soqtoqnqom!" Tamo uŋgasari naŋgi degoqnsib lelen ti Yesus dauryoqneb.

**11** Onaqa Yesus a walwelosi aisiq Jerusalem di brantosiqa atra tal koba miligiq gilej. Gilsiq ingi ingi kalil atra tal miligiq di soqnej qaji di ko-

qyoqnej. Osiq bilaqtonaqa a olo atra tal koba uratosiq aqa segi aŋgro 12 naŋgi joqsiqa koba na puluosib Betani qureq gileb.

*Yesus a qura minjej, “Ni olo bunu geitqasai”*

<sup>12</sup> Nebeonaqa Yesus aqa aŋgro naŋgi ti olo tigelosib Betani qure uratosib aiyeb. Naŋgi aiy-oqnsibqa gamq di Yesus a mamyej.

<sup>13</sup> Onaqa a isaq na ŋam atsiqa qura baŋga ti sonaq unsiqa aqa gei unqajqa utruq gilej. Gilsiq unej qura gei bei saiqoji. Geitqa batı sai deqa baŋga segi sonab unej.

<sup>14</sup> Unsiqa qura di minjej, “Ni olo bunu geitqassai. Tamo bei a bosim ino gei bei oqasai.” Degsi minj-naqa aqa aŋgro naŋgi queb.

*Yesus na tamo uŋgasari naŋgi atra talq dena win-jrej*

<sup>15</sup> Onaqa Yesus aqa aŋgro naŋgi ti walwelosi aisib Jerusalem di branteb. Brantosib Yesus a atra tal koba miliq qarsiqa ŋam atej di tamo uŋgasari gargekoba naŋgi iŋgi iŋgi qariŋyoqnsibqa dena silali eqnab unjrsiqa naŋgi winjrnaq jaraiyeb. Tamo qudei naŋgi silali piloqneb. Qudei naŋgi binor qariŋyoqnsib dena silali oqneb. Deqa Yesus a naŋgo jar ti jaram ti bilbelyosiqa naŋgi dego winjrnaq jaraiyeb.

<sup>16</sup> Osiqa tamo uŋgasari atra tal miliq di iŋgi iŋgi osi laqneb qaji naŋgi dego saidnjrsiqa winjrnaq jaraiyeb.

<sup>17</sup> Naŋgi kalil jaraiyeqnabqa Yesus na minjrej, “Qotei aqa anjam bei nami endegsib neŋgreŋyeb unu, ‘Ijo tal endi tamo uŋgasari kalil naŋgo pailyqa-jqa tal.’ Qotei aqa anjam degsi unu. Ariya ninji

na olo tal endi ugetonubqa a bajiq tamo nañgo tal bulqo.”

**18** Onaqa atra tamo kokba ti dal anjam qalie tamo nañgi ti Yesus aqa anjam di qusibqa nañgi a qa ulaosib a qalib moiqajqa gam ñamoqneb. Di kiyaqa? Tamo ungasari kalil nañgi Yesus aqa anjam quqwaqja tulañ arearetnjroqnej deqa.

**19** Ariya bilaqtonaqa Yesus aqa aŋgro nañgi koba na olo Jerusalem uratosib gileb.

### *Qura a laosiq moiyej*

**20** Nebeonaqa Yesus aqa aŋgro nañgi ti olo tigelosib gam dauryosib aiyoqnsib qura di olo uneb utru ti kalil laosiq moiyej.

**21** Onaqa Pita a Yesus aqa anjam nami qura minjej qaji deqa olo are qalsiqa Yesus minjej, “O Tamko Koba, ni unime. Qura ni ya ñirintem qaji agi laosiq moiqo.”

**22** Onaqa Yesus na aqa aŋgro nañgi endegsi minjrej, “Niñgi Qotei qa nunjo areqalo singilatiy.

**23** E bole mern̄gawai. Tamo bei a areqalo aiyeltqasai di a mana kobaquja endi minjqas, ‘Ni tigelosim yuwalq aiye.’ Aqa are miliqiq di a endegsi are qalqas, ‘Bole, mana di a ijo anjam dauryqas.’ Degsi are qalqas di mana a aqa anjam dauryosim tigelosim yuwalq aiqas.

**24** Deqa niñgi quiy. Niñgi ingi bei qa Qotei pailyqa osibqa endegsib are qaliy, ‘Ingi di Qotei na egwas.’ Degr̄sib are qalsib pailyqab di a na eŋwas.

**25** Deqa niñgi Qotei pailyqa osibqa tamo bei qa anjam soqnimqa niñgi na aqa une kobotosib Qotei pailyiy. Yimqa nunjo Abu lañ qureq di unu qaji a kamba nunjo une kalil kobotetŋwas.

<sup>26</sup> Ariya ningi tamo di aqa une kobotetqasai di nunjgo Abu lañ qureq di unu qaji a dego nunjgo une kobotetŋgwasai.”

*Juda nañgi na Yesus nenemyeb, “Ni siñgila qabe na osimqa kumbra endi yeqnum?”*

<sup>27</sup> Osiqa Yesus a aqa angro nañgi koba na wal-welosib aisib olo Jerusalem di branteb. Brantosib Yesus a atra tal koba miliq gilsiq dia walwele-qnaqa atra tamo kokba ti dal anjam qalie tamo nañgi ti Juda gate nañgi ti Yesus aqa areq bosib nenemyeb,

<sup>28</sup> “Ni iga merge. Ni siñgila qabe na osimqa kumbra endi yeqnum? Yai na ni qariñmej deqa ni bosim wau endi yeqnum?”

<sup>29</sup> Onaqa Yesus na minjrej, “E kamba anjam bei ningi nenemŋgwai. Nenemŋgitqa ningi e merbibqa e yai na qariñbonaq bosim wau endi yeqnum di ubtosiy mernŋgwai.

<sup>30</sup> Niñgi na merbiy. Yai na Jon qariñyonqa bosiqta tamo ungasari nañgi yansnjroqnej? Qotei na kiyo? Tamo bei na kiyo?”

<sup>31</sup> Onaqa nañgi Yesus aqa anjam di quhibqa segi segi qairosib mareb, “Iga Yesus minjqom, ‘Qotei na Jon qariñyej,’ degsi minjqom di a iga mergwas, ‘Kiyaqa niñgi Jon aqa anjam quetosai?’

<sup>32</sup> Ariya iga minjqom, ‘Tamo bei na Jon qariñyej,’ degsi minjqom di dego keresai.” Nañgi tamo ungasari nañgi ulainjrsib deqa degsib qaireb. Di kiyaqa? Tamo ungasari nañgi maroqneb, “Jon a Qotei aqa medabu o qaji tamo bole.”

<sup>33</sup> Nañgi degsib qairosib olo Yesus minjeb, “Yai na kiyo Jon qariñyej di iga qaliesai.” Onaqa Yesus

na kamba minjrej, “Niŋgi degsib merbonub deqa e dego yai na qarinjbonaq bosim wau endi yeqnum di niŋgi mernŋgwasai.”

## 12

### *Wain wau qa yawo anjam*

<sup>1</sup> Yesus na Juda tamo kokba naŋgi degsi minjrsiqa olo yawo anjam bei endegsi minjrej, “Tamo bei a tigelosiqa aqa wauq gilej. Gilsiq wain sil yageleŋosiqa jeŋ qosej. Qoso koboonaqa meniŋ qura gogeq di tabir kuru bul gereiyej. Wain sil geitimqa wain gei koroiyosib paraparaiyosib aqa ya dia bilentqajqa deqa gereiyej. Osiqa wauq di tal atsiqa wau taqato tamo qudei naŋgo baŋq di aqa wau uratetnrsiqa sawa isaq gilsiq di soqnej.

<sup>2</sup> Sonaqa wain gei melionaqa a na aqa kaŋgal tamo bei qarinjonaqa wau taqato tamo naŋgoq aisiqa minjrej, ‘Wau lanja na e qarinbqo bonum. Deqa ningi wain gei ebibqa e na osi gilqai.’

<sup>3</sup> Degsi minjrnaqa naŋgi na a ojsib qalougetosib wiyonab laŋa puluosiq gilej.

<sup>4</sup> Gilnaqa wau lanja na olo kaŋgal tamo bei qarinjonaq ainaqa a dego ojsib aqa gate paratesisib tulan ugeugeiyeb.

<sup>5</sup> Onaqa wau lanja na olo kaŋgal tamo bei qarinjonaq ainaqa a dego qalougetosib moiyoteb. Olo kaŋgal tamo gargekoba naŋgi qarinŋreqnaqa aiyeqnab qudei ŋumougetoqneb. Qudei moiyotnroqneb.

<sup>6</sup> Onaqa wau lanja a endegsi are qalej, ‘Ijo segi angro qujai e na tulan qalaqlaiyeqnum qaji di

qarinyit aiqas di naŋgi a qalqasai. Naŋgi aqa anjam quetqab.'

<sup>7</sup> Degsi are qalsiqa aqa segi ɻiri qarinyonaq aiyej. Aiyeqnaqa wau taqato tamo naŋgi a unsibqa segi segi qairosib mareb, 'Tamo a bqo endi wau lanja aqa segi ɻiri. A na aqa abu aqa iŋgi iŋgi kalil oqas. Deqa iga a qalsim moiyotosimqa wau endi iga na oqom.'

<sup>8</sup> Degtisib marsibqa wau lanja aqa ɻiri ojsib qalnab moinaqa aqa jejamu osib wau qalaq di waiyeb.

<sup>9</sup> "Deqa niŋgi kiyersib are qalonub? Wau lanja a bosimqa wau taqato tamo uge naŋgi di kiyern-jrqas? E niŋgi merŋgwai. A bosim naŋgi ſumsim moiyotnjrqas. Osim aqa wau di olo yainjrsim tamo qudei naŋgo baŋq di uratetnjrimqa naŋgi na kamba taqatesqab.

<sup>10</sup> "Qotei aqa anjam bei unu. Niŋgi anjam di nami sisiyosai kiyo? Anjam agiende, 'Tal gereiyo qaji tamo naŋgi na tal ai arqsibqa uge qa marsib taqal waiyeb.

Onaqa tal ai di Qotei na olo osiq tumaq di tigeltej unu.

Tal ai di tal ſiŋgilatqajqa deqa tigeltej.

<sup>11</sup> Tamo Koba a segi na tal ai di tigeltej deqa iga unsim mareqnum,

"Tal ai di tulaŋ bolequja." . . .

<sup>12</sup> Onaqa Juda tamo kokba naŋgi yawo anjam di quisib endegsib qalieeb, Yesus a yawo anjam dena naŋgo jejamuq di une qametnjrej. Naŋgi degsib qaliesib deqa Yesus ojqa mareb. Ariya naŋgi tamo ungasari naŋgi ulainjrsib deqa naŋgi Yesus ojqa uratosib jaraiyeb.

*“Iga Sisar takis yqom e?”*

**13-14** Juda tamo kokba naŋgi jaraiyosib Farisi naŋgi ti Herot aqa wau tamo qudei ti naŋgoq aisia minjreb, “Niŋgi Yesus aqaq gilsib anjam bei nene-myibqa a anjam grotim iga qusim ojqom.” Degtisib minjrsib naŋgi qarijnernab Yesus aqa areq gilsib minjeb, “O Qalie Tamo, iga qalie, ni anjam bole maro qaji tamo. Ni anjam bole segi tamo uŋgasari naŋgi minjroqnsim Qotei aqa kumbra osornjreqnum. Ni tamo bei ulaiyosaieqnum. Ni tamo ñam ti naŋgi anjam bei minjroqnsim olo tamo ñam saiqoji naŋgi anjam bei minjrosaieqnum. Ni anjam qujai tamo kalil naŋgi minjreqnum. Deqa ni iga merge. Iga Sisar takis yqom e? Yqasai e? Ni kiyersi are qalonum?”

**15** Onaqa Yesus a naŋgo gisan anjam di poiyon-aqa minjrej, “Kiyaqa ningi e anjam bei grotitqa qusib e ojqajqa deqa gisanbeqnub? Meniŋ silali bei osi boiy. Osbab e unqai.”

**16** Degsi minjrnaqa naŋgi meniŋ silali bei osi bosib osoryonab unsiqa minjrej, “Meniŋ silali quraq endi tamo yai aqa ulatamu ti ñam tiunu?” Onaqa naŋgi na minjeb, “Di Sisar aqa.”

**17** Onaqa a na minjrej, “Deqa Sisar aqa ingi ingi a qa olo yiy. Qotei aqa ingi ingi a qa olo yiy.” Onaqa naŋgi Yesus aqa anjam di qusibqa tulan prugugeteb.

*Tamo moreŋo qaji naŋgi olo subq na tigelqab*

**18** Onaqa bati deqa Sadyusi tamo qudei naŋgi Yesus aqa areq beb. Sadyusi naŋgi mareqnub, “Tamo moreŋo qaji naŋgi olo subq na tigelqasai.” Deqa naŋgi bosib Yesus endegsib minjeb,

**19** “O Qalie Tamo, ni que. Moses a nami dal anjam endegsi neñgrenyej, ‘Tamo bei a moiylimqa aqa uña angro saiqoji soqnimqa aqa was bei na olo uña qobul di osim aqa was moiyej qaji aqa angro uñambabtetaqas.’ Moses a nami dal anjam degsi neñgrenyej.

**20** Deqa ni que. Was 7 nañgi soqneb. Nañgo was matu a uña osiqa moiyej. A angro saiqoji.

**21** Onaqa aqa was yala na olo uña qujai di osiqa a dego moiyej. A angro saiqoji. Onaqa aqa was yala na olo uña di ej. Osiqa a dego moiyej. A angro saiqoji.

**22** Was 7 kalil nañgi uña qujai di osib morenjeb. Nañgi angro saiqoji. Nañgi kalil moreñonabqa ariya bunuqna uña di a dego moiyej.

**23** Deqa ni iga merge. Mondoñ subq na tigelo batiamqa tamo kalil nañgi subq na tigelabqa uña di a yai aqa uña tñtiñ sqas? Ni qalie, was 7 kalil nañgi uña qujai di eb.”

**24** Onaqa Yesus na minjrej, “Qotei aqa anjam neñgrenq di unu qaji di aqa damu niñgi poiñgosai e? Qotei aqa siñgila dego niñgi poiñgosai e? Od, niñgi poiñgosai. Utru deqa niñgi anjam grotonub. Grotosib agi nenembonub.

**25** Mondoñ tamo ungasari nañgi subq na tigelosi-bqa nañgi uñatqasai. Nañgi tamotqasai. Nañgi lañ angro bul laña sqab.

**26** “Niñgi quiy. Tamo nañgi moisib olo subq na tigelqab anjam di aqa utru Moses a nami babtosiq neñgrenyej. Di niñgi sisiyosai kiyo? Ñam mariñ miliq di puloñeqnaqa Qotei a ñam puloñq di sosiqa Moses metosiq endegsi minjej, ‘E Abraham aqa Qotei. E Aisak aqa Qotei. E Jekop aqa Qotei.’

**27** Qotei na Moses degsi minjej deqa iga qalieonum, Qotei a tamo moreño qaji naŋgo Qotei sai. A tamo ḥambile so qaji naŋgo Qotei. Anjam di ningi tulanq grotonub!"

*Dal anjam kiye a tulanq bolequja?*

**28** Onaqa dal anjam qalie tamo bei a bosiqa Yesus a Sadyusi naŋgi ti anjam na qoteqnab unjrej. Yesus a geregere Sadyusi naŋgi kamba anjam minjrnaqa quisiga Yesus nenemyej, "Qotei aqa dal anjam kiye a segi qujai tulanq bolequja? Dal anjam kiye a dal anjam kalil buŋnjrejunu?"

**29** Onaqa Yesus na minjej, "Dal anjam tulanq bolequja agi mermqai. 'O Israel ningi quiy. Gago Tamo Koba Qotei a segi qujai Tamo Koba.

**30** Deqa ni ino Tamo Koba Qotei a tulanq qalaqlaiyime. Qalaqlaiyosim ino are miligi ti ino qunuŋ ti ino areqalo ti ino siŋgila ti kalil a yekritime.' Dal anjam di a segi qujai tulanq bolequja. A na dal anjam kalil buŋnjrejunu.

**31** Ariya dal anjam deqaji bei dego mermqai. Dal anjam agiende. 'Ni ino segi jejamu gereiyeqnum dego kere ino was naŋgi degsim geregereinjroqni-me.' Dal anjam boledamu aiyal agi e na mermonum. Dal anjam deqaji bei saiqoji."

**32** Onaqa dal anjam qalie tamo dena kamba Yesus minjej, "O Qalie Tamo, ni bole maronum. Qotei a segi qujai. Qotei bei saiqoji.

**33** Iga a tulanq qalaqlaiyosim gago are miligi ti gago powo ti gago siŋgila ti kalil a yekritqom di kumbra bolequja. Iga gago segi jejamu gereiyeqnum dego kere gago was naŋgi degsim geregereinjroqni-qom di dego kumbra bolequja. Dal an-

jam aiyel di tulañ boledamu. Iga iŋgi iŋgi Qotei atraiyqom di laña kiñala. Iga iŋgi bei ɻamyuwo na koitosim Qotei atraiyqom di dego laña kiñala. Ariya iga dal anjam aiyel di dauryqom di tulanç bolequja.”

**34** Dal anjam qalie tamo di a tulanç poiyonaqä anjam degsi marnaqa Yesus a quasiqa minjej, “Ni anjam tulanç boledamu maronum. Deqa sokiñala Qotei na ni taqatmosim ino Mandor Koba sqas.”

Onaqa tamo ungasari nañgi olo anjam bei Yesus nenemyqajqa ulaeb.

### *Kristus a kiyersim Devit aqa ɻiri sqas?*

**35** Onaqa Yesus a atra tal koba miliqiqliq di sosiqa Qotei aqa anjam plaltoqnej. Osiqa tamo ungasari nañgi anjam bei endegsi minjrej, “Dal anjam qalie tamo nañgi kiyaqa mareqnub, ‘Kristus a Devit aqa ɻiri’?”

**36** Devit a nami marej, ‘Kristus a ijo Tamo Koba.’ Agi Mondor Bole na Devit aqa medabu singilatetonaqa a endegsi marej,  
‘Tamo Koba a na ijo Tamo Koba minjej,  
“Ni ijo banj woq endi awo.

Awesoqnimqa e ino jeu tamo kalil nañgi elejosiy  
      ino sorgomq di atitqa ni na nañgi taqatnjro-  
      qnqam.”

**37** Niñgi uniy. Devit a marej, ‘Kristus a ijo Tamo Koba.’ Deqa Kristus a kiyersim Devit aqa ɻiri sqas?”

### *Dal anjam qalie tamo nañgi kumbra uge uge yoqneb*

Tamo ungasari gargekoba nañgi sosibqa Yesus aqa anjam quqwaqqa tulanç arearetnjroqnej.

**38** Yesus a anjam bei endegsi plaltosiq minjrej, “Niñgi dal anjam qalie tamo nañgo kumbra uge geregere tenemtoqniy. Nañgi koro sawaq di tamo ungasari nañgi na nañgo ñam soqtetnjsib bañ ojet-njrqajqa deqa gara olekokba jugoqnsib laqnub.

**39** Nañgi Qotei tal miligiq di, goiyo kokbaq di sosibqa tamo ñam ti nañgo awo jaramq di awooqnn-qajqa deqa areboleboleinjreqnu.

**40** Nangi uña qobul nañgi gisanjnjqroqnsibqa nañgo tal ti ingi ingi ti laña yainjreqnub. Osib tamo ungasari nañgi na unjrsib nañgo ñam soqtetnjqraqajqa deqa pailyo olekokba yeqnub. Deqa mondon Qotei na nañgi awai tulan ugedamu enjrqas.”

### *Uña qobul aqa silali kiñala soqnej di Qotei yekritej*

**41** Osiqa Yesus a atra tal miligiq di sosiqa silali ato qaji kulum jojomq di awoej. Awoosiqa ñam atej di tamo ungasari nañgi boqnsib silali ateqnab unjroqnej. Ñoro tamo gargekoba nañgi boqnsib silali tulan kokba atoqneb.

**42** Onaqa uña qobul bei ñoro tulan saiqoji a dego bosiqa meniñ silali kiñilala aiyel segi atej.

**43** Atnaqa Yesus na unsiqa aqa angro nañgi metnjerenaqa aqa areq bonabqa minjrej, “E bole merengwai. Uña qobul endi a ñoro tulan saiqoji. Deqa a na ñoro tamo kalil nañgi buñjrsiqa silali kobaquja atqo.

**44** Ñoro tamo nañgi silali koba ejunub. Nañgi oto kiñala segi ateqnub. Ariya uña qobul endi a silali tulan sai bole sai. Aqa meniñ silali kiñilala aiyel segi naj agi atekritqo.”

# 13

## *Bunuqna jeu tamo nañgi na atra tal niñaqyqab*

<sup>1</sup> Osiqa Yesus na aqa aŋgro nañgi joqsiqa koba na atra tal koba uratosib giloqnsibqa aqa aŋgro bei na minjej, “O Qalie Tamo, ni unime. Atra tal endi tulañ bolequja. Atra tal walato qaji meniñ di tulañ boledamu!”

<sup>2</sup> Onaqa Yesus na kamba minjej, “Atra tal ni unonum endi bunuqna jeu tamo nañgi na bosib tulan niñaqyosib aqa meniñ kalil paraparainjrsibqa taqal breinjrqab. Yimqa meniñ bei meniñ bei aqa quraq di sqasai. Meniñ kalil segi segiqab.”

## *Gulbe kobaquja bunuqna brantqas*

<sup>3</sup> Osiqa Yesus a Oliv manaq oqsiq atra tal areiyosiq awesonaqa Pita na Jems na Jon na nañgi qalub Yesus aqa areq bosib lumu nenemyeb,

<sup>4</sup> “Ni iga merge. Bati gembu jeu tamo nañgi bosib atra tal endi niñaqyqab? Niñaqyqa osibqqa kumbra kiye namoqna brantim iga unsim poigwas, ‘Bati di jojomqo?’”

<sup>5</sup> Onaqa Yesus na minjrej, “Niñgi geregere ñam atoqniy. Tamo qudei na niñgi gisanjo uge.

<sup>6</sup> Bunuqna gisan tamo gargekoba nañgi ijo ñam na bosib tamo uñgasari nañgi minjroqnqab, ‘E Kristus.’ Degsib tamo uñgasari tulañ gargekoba nañgi gisa gisanjroqnqab.

<sup>7</sup> “Bunuqna sawa bei bei qaji nañgi aŋ na qotokobaoqnqab. Niñgi deqa qusib ulaaib. Qotei a nami marej, ‘Kumbra di brantqas.’ Deqa brantem. Ariya kumbra di brantimqa diŋo bati urur brantqasai. Soboleiyosim brantqas.

**8** Bati deqa sawa bei ti sawa bei ti qotoqnqab. Mandor qudei naŋgi tigeloqnsibqa mandor qudei naŋgi qoto itnjroqnqab. Sawa bei beiq di miminj kokba ti mam ti iŋgi saio bati brantelenqas. Kumbra kalil di uŋga aŋgrotqa osiqa mati jaqatinj kiňala eqnu dego kere.

**9** “Deqa niŋgi geregere ŋam atoqniy. Kumbra kalil di brantosaisoqnimqa Juda naŋgi na bosib niŋgi ojeleŋosib anjam pegino talq di niŋgi tigelŋgoqnqab. Osib nango Qotei tal miliqiq di niŋgi kumbaingoqnsib olo niŋgi joqoqnsib Rom nango gate ti naŋgo mandor ti naŋgo ulatamuq di niŋgi tigelŋgoqnqab. Yimqa niŋgi ijo anjam bole palontoqnsib naŋgi minjroqnqab.

**10** Sawa sawa kalilq di dego niŋgi ijo anjam bole ubtosib mare mare laqniqbqa tamo uŋgasari naŋgi quoqnqab. Amqa diŋo bati brantqas.

**11** Naŋgi na niŋgi ojoqnsib anjam pegino talq di tigelŋgoqniqbqa niŋgi endegsib are qalaib, ‘Iga na kamba anjam kiyersi minjrqom?’ Niŋgi degaib. Bati deqa Qotei na powo eŋgoqnimqa niŋgi kamba anjam minjroqnqab. Niŋgi segi na anjam minjrqasai. Mondor Bole na nunjo medabu singilatetŋgim niŋgi anjam marqab.

**12** Bati deqa kumbra uge endeqaji brantqas. Tamo qudei na naŋgo segi was naŋgi ojoqnsib qaja tamo naŋgo banq di atoqnibqa naŋgi na naŋgi ñumoqniqb moreŋqoqnqab. Tamo qudei na naŋgo segi aŋgro naŋgi degsib ojoqnsib. Aŋgro qudei na naŋgo segi ai abu naŋgi jeutnjroqnsib ojoqnsib qaja tamo naŋgo banq di atoqnibqa naŋgi na naŋgi ñumoqniqb moreŋqoqnqab.

**13** Niŋgi ijo ńam ejunub deqa tamo kalil naŋgi

ninjì qa are tulàñ ugeinjroqnqas. Ariya ninjì ijo ñam singila na ojsib gilsib diñò bati itqab di Qotei na ninjì elenqas.”

### *Ingi tulàñ ugedamu brantqas*

<sup>14</sup> Osiqa Yesus a olo marej, “Diñò batiamqa ingi tulàñ ugedamu a Qotei aqa getento warum miligiq di tigelesoqnim ninjì unqab.” E Mak. Tamo ungasari ijo anjam endi sisiyeqnub qaji nañgi geregere sisiyosib poinjrem. Poinjrim marqab, bole. Osiqa Yesus na aqa añgro nañgi olo endegsi minjrej, “Niñgi ingi ugedamu di unsibqa bati deqa tamo ungasari Judia sawaq di unub qaji nañgi jaraiyosib manaq oqoqujatebe.

<sup>15</sup> Tamo ungasari tal meq di unub qaji nañgi jaraiqa oqnsib ingi ingi oqa osibqa olo warum miligiq gilaib. Nañgi jaraiyoqujatebe.

<sup>16</sup> Tamo ungasari wauq di unub qaji nañgi jaraiqa oqnsib nañgo gara jugo oqa osibqa olo puluosib qureq baib. Nañgi torei dena jaraiyoqujatebe.

<sup>17</sup> Bati deqa uña gumanj ti uña añgro mom ti nañgi jaraiyo bañgioqnsib gulbe koba oqab.

<sup>18</sup> Deqa ningi endegsib pailyoqniy, ‘Gulbe di awa bati qa brantaiq.’

<sup>19</sup> Niñgi degsib pailyoqniy. Di kiyaqa? Bati deqa tamo ungasari nañgi gulbe tulàñ kobaqua oqab. Gulbe deqaji nami brantosaioqnej. Qotei na mandam atej bati deqa gulbe deqají brantosai dena bosi bosiq agi bini unum. Bunuqna laña ambleq di dego brantqasai. Agi bati qujai deqa brantqas.

**20** Gulbe di aqa bati Tamo Koba a na truqutqas. A na truqutqasai di tamo uŋgasari kalil naŋgi padalekritqab. Aqa segi tamo uŋgasari nami gilt-njrej qaji naŋgi padalaib deqa a na gulbe di aqa bati truqutqas.

**21** “Bati deqa tamo qudei na merŋgwab, ‘Ninji uniy. Kristus a bqo agiende’ o ‘Kristus a bqo agide.’ Degtib merŋgibqa ninji naŋgo anjam quetnjraib.

**22** Tamo qudei naŋgi bosib gisaŋosib maroqnqab, ‘E Kristus.’ Qudei naŋgi maroqnqab, ‘E Qotei aqa medabu o qaji tamo bole.’ Degtib maroqnqab manwa kokba gargekoba babtoqnqab. Naŋgo manwa dena naŋgi na tamo uŋgasari kalil areqalo niňaqyetnjroqnqab. Osib Qotei aqa segi tamo uŋgasari nami giltnjrej qaji naŋgo areqalo dego niňaqyetnjrqajqa wauoqnqab.

**23** Deqa niŋgi geregere ḥam atsib soqniy. Kumbra kalil di brantosaisonaqa e namoqna merŋgonum.”

### *Tamo An̄gro a siŋgila ti riaŋ ti bqas*

**24** Osiqa Yesus a olo marej, “Gulbe kalil di naŋgo bati koboamqa seŋ ambruqas. Bai dego suwaŋqasai.

**25** Bongar naŋgi laŋ goge na ululosoib mandamq aiyeleŋqab. Laŋ goge dia iŋgi iŋgi kalil reŋgiyelenqab.

**26** Bati deqa e Tamo An̄gro siŋgila ti riaŋ koba ti lanbiq na mandamq aiyoqnit tamo uŋgasari naŋgi tarosib e nubqab.

**27** Yimqa bati deqa e na ijo laŋ an̄gro naŋgi qariŋnjritqa naŋgi sawa sawa kalil keretosib Qotei

aqa segi tamo uŋgasari nami giltnjrej qaji naŋgi laŋ utru utruq na koroinjrqab.”

*Niŋgi qura qa yawo anjam dena poiŋgem*

<sup>28</sup> Osiqa Yesus a olo marej, “E na qura qa yawo anjam niŋgi mern̄gitqa dena geregere poiŋgem. Qura banja qalsim olo ňalguyoqnimqa niŋgi unsib qalieqab, ‘Seŋ aqa bati jojomqo.’

<sup>29</sup> Dego kere kumbra kalil e ubtosim mern̄gonum qaji endi brantimqa niŋgi unsib endegsib qalieoiy, ‘Bole, Kristus bqajqa bati jojomqo. A siraŋmeq di tigelejunu.’

<sup>30</sup> E bole mern̄gwai. Tamo uŋgasari bini bati endeqa unub qaji naŋgi kalil moreŋosaisoqnibqa kumbra kalil endi brantqas.

<sup>31</sup> Lan ti mandam ti koboqab. Ariya ijo anjam koboqa keresai.”

*Yesus bqajqa bati di tamo bei a qaliesai*

<sup>32</sup> Osiqa Yesus a olo marej, “Ijo bqajqa bati tamo qujai bei a qaliesai. Lan aŋgro naŋgi qaliesai. E Qotei aqa Niri e segi dego qaliesai. Ijo Abu a segi qaliesai.

<sup>33</sup> “Ninji ijo bqajqa bati qaliesai deqa ninji geregere ɣam atsib soqniy.

<sup>34</sup> Ijo bqajqa bati di tamo bei a sawa isaq gilej dego kere. A gilqa osiqa aqa kaŋgal tamo naŋgo banq di aqa tal ti ingi ingi ti uratetn̄jrsiqa naŋgi wau segi segi enrej. Aqa kaŋgal tamo bei minjej, ‘Ni siraŋmeq di tigelesosim geregere ɣam atoqne.’

<sup>35</sup> Degsi minjej. Dego kere ninji geregere ɣam atsib soqniy. Di kiyaqa? Tal lanja a olo bqajqa bati ninji qaliesai. A bilaq kiyo, qolo kiyo, tuwe anjamoqnimqa kiyo, nobqolo kiyo bqas.

**36** A boqujatosim niŋgi ɻereŋesoqnib nuŋgaim deqa niŋgi geregere ɣam atsib soqniy.

**37** E anjam merŋgonum qaji endi tamo kalil naŋgi dego minjreqnum. Ijo anjam agiende, ‘Ningi geregere ɣam atsib soqniy.’” Yesus na aqa aŋgro naŋgi degsi minjrej.

## 14

*Juda tamo kokba naŋgi Yesus qalib moiqajqa gam ɣamoqneb*

**1** Onaqa Juda naŋgo yori bati koba jojomej. Yori bati di aqa ñam Bem Tiyosai Qaji Uyqajqa Bati. Qotei a nami Israel naŋgi Isip sawaq di padalqa laqnabqa aqaryainjrej. Deqa olo are qalqajqa bati jojomej. Bati aiyel soqnej. Deqa atra tamo kokba ti dal anjam qalie tamo naŋgi ti endegsib nenemoqneb, “Iga kiyersim Yesus lumu na ojsim qalsim moiyatqom?”

**2** Osib mareb, “Iga yori bati qa Yesus ojqasai. Ojqom di tamo ungasari naŋgi iga nugsib ɻiriŋosib qoto tigelto uge.”

*Uŋa bei a goreŋ quleq ti osiq Yesus aqa gateq di bilentej*

**3** Onaqa Yesus a Betani qureq gilsicha tamo bei nami yu na aqa jejamu ugeelenjej qaji aqa ñam Saimon aqa talq di soqnej. Sosiqa ingi uyeqnaqa uŋa bei a goreŋ quleq ti tulaj boledamu silali kobaquja na awaiyej qaji di jalinjaq jigsicha osi bosiqa aqa medabu paratosiqa Yesus aqa gateq di bilentej.

**4** Onaqa tamo qudei tal miligiq di awesoqneb qaji naŋgi uŋa di aqa kumbra unsibqa ɻiriŋosib

segi segi maroqneb, “Uŋa di a kiyaqa goreŋ di laŋa ñaŋguiyqo?

<sup>5</sup> A goreŋ di osiq tamo qudei enjrqo qamu meniŋ silali 300 yonub qamu gilsiq tamo iŋgi iŋgi saiqoji naŋgi jeisi enjrqo qamu di kere.” Osib naŋgi uŋa di njirinteb.

<sup>6</sup> Onaqa Yesus na kamba minjrej, “Ninji kiyaqa uŋa di gulbe yeqnub? A kumbra bole ebqo.

<sup>7</sup> Tamo iŋgi iŋgi saiqoji naŋgi bati gaigai ningi ti sqab. Deqa ningi na naŋgi aqaryainjrqa are soqnimqa aqaryainjroqniy. Ariya e bati gaigai ningi ti sqasai.

<sup>8</sup> E moiqai. Moiyitqa e subq atqab. Uŋa di a e qa are qalsiqa ijo jejamuq di goreŋ bilentosiq dena ijo jejamu subq atqajqa gereiyethbqo. A na kumbra di e qa yqa kere agi yqo.

<sup>9</sup> E bole merŋgħi. Bunuqna ijo wau tamo naŋgi sawa sawa kalilq di ijo anjam bole mare mare laqnsibqa uŋa endena kumbra ebqo qaji deqa are qaloqnsib a qa saoqnqab.”

*Judas a Yesus osim atra tamo kokba naŋgo baŋq di atqas*

<sup>10</sup> Onaqa Judas Iskariot a tigelosiqa atra tamo kokba naŋgoq gilej. Judas a Yesus aqa aŋgro 12 naŋgi deqaji bei. A naŋgoq gilsiqha minjrej, “E Yesus osiy nunġo baŋq di atqai.”

<sup>11</sup> Degt minjrnraqa naŋgi quisib tulan arebole-boleinjrnaqa minjeb, “Ni Yesus osim gago baŋq di atimqa iga ni silali emqom.” Degt minjnabqqa a gilsiqha a Yesus osim naŋgo baŋq di atqajqa gam ñamoqnej.

*Yesus aqa aŋgro naŋgi ti yori bati aqa iŋgi uyeb*

**12** Ariya Bem Tiyosai Qaji Uyqajqa Bati bran-tej. Qotei a nami Israel naŋgi endegsi minjrej, “Niŋgi kaja du du naŋgi ŋumeleŋjosib siraŋmeq di len liyibqa e na unsiy niŋgi uratŋgwai. E niŋgi padalŋgwasai.” Qotei a nami Israel naŋgi degsi minjrej. Kumbra deqa olo are qalqajqa yori bati brantonaqa Juda naŋgi mareb, “Iga kaja du du naŋgi ŋumeleŋjosim Qotei atraiyqom.” Onaqa bati deqa Yesus aqa angro naŋgi na endegsib nene-myeb, “Ni iga merge. Iga aisim tal qabia yori bati aqa inŋgi inŋgi gereiyetmonamqa ni inŋgi uyqam?”

**13** Onaqa Yesus na aqa angro aiyel qariŋnjsiqa minjrej, “Niŋgi aiyel aisib qure ambleq di tamo bei ya nobu qoboiyosim giloqnim gamq di itosib dauryiy.

**14** Niŋgi a dauryosib tal a gogetqas qaji di miliq qilsib tal lanja endegsib minjiy, ‘Qalie Tamo a marqo, “E ijo angro naŋgi koba na awoosim yori bati aqa inŋgi uyqajqa warum a qabiunu?”’

**15** Niŋgi degsib minjibqa a na warum kobaquja bei gogeqsiunu di niŋgi osorŋgas. Warum dia nami jar ti awo jaram ti atelenjebunu. Niŋgi aiyel aisib warum dia gago inŋgi inŋgi gereiyeleŋjoiy.

**16** Onaqa naŋgi aiyel qure miliqqaisib anjam kalil Yesus na minjrej qaji degsi brantonab unsibqa inŋgi inŋgi kalil warum dia gereiyeleŋjeb.

**17-18** Onaqa bilaqtonaqa Yesus aqa angro 12 naŋgi ti koba na aisib tal gogetosib awoosib inŋgi uyoqnsibqa Yesus a naŋgi endegsi minjrej, “E bole merŋgwai. Niŋgi ijo angro 12. Nunqo ambleq dena angro bei a tigelosim e osim tamo qudei naŋgo banq di atqas. Angro di agi iga koba na inŋgi uye-qnum.”

**19** Dëgsi minjrnaq quşibqa are tulan gulbekobainjrnaqa segi segi Yesus neneemyoqneb, “O Tamo Koba, ni e qa kiyo maronum?”

**20** Onaqa minjrej, “Añgro aqo ombla endego tabir qujaiq di bem quiq di tuqteqnum qaji a na e osim tamo qudei nañgo banq di atqas. A degó ijo añgro 12 niñgi deqaji bei.

**21** Niñgi quiy. E Tamo Añgro moiqai. Nami Qotei aqa anjam e qa degsib neñgreñyeb. Deqa uñgum. E anjam di dauryosiy moiqai. Ariya añgro e osim tamo qudei nañgo banq di atqas qaji a tulan padalogetqas. A nami ñambabosai qamu di kere.”

*Yesus na aqa añgro nañgi bem ti wain ti anainjrej*

**22** Osiga Yesus aqa añgro nañgi koba na ingi uyoqnsibqa Yesus a Qotei pailyosiqa bem bei osiq giñgeñyosiqa nañgi enjrsiqa endegsi minjrej, “Endi ijo jejamu. Osib uyiy.”

**23** Osiga wain osiga gambañq di bilentosiqa Qotei pailyosiqa aqa añgro nañgi enjrsiqa nañgi kalil osib uyeb.

**24** Onaqa Yesus na minjrej, “Wain gambañ endi ijo leñ. Tamo uñgasari gargekoba nañgo une kobotetnjqajqa deqa ijo leñ aiqas. Aisim Qotei aqa anjam bunuj nami gereiyej qaji di siñgilatqas.

**25** E bole merñgwai. E wain endi olo uyqasai. Dëgsi gilsiy mondoñ diño batiamqa Qotei a nuñgo Mandor Koba soqnimqa e olo wain bunuj uyqai.”

**26** Yesus na aqa añgro nañgi degsi minjrsiqa nañgi koba na louosib koboonaqa qure uratosib Oliv manaq oqeb.

*Yesus na aqa añgro nañgi minjrej, “Niñgi kalil e uratbosib jaraiqab”*

**27** Yesus aqa angro naŋgi ti manaq oqoqnsibqa Yesus na minjrej, “Niŋgi kalil ijo ñam ulontosib e uratbosib jaraiqab. Nunjo kumbra deqa Qotei aqa anjam bei nami endegsib neŋgreŋyeb unu, ‘E na kaja naŋgo mandor qalitqa kaja naŋgi segi segi jaraiqab.’ Qotei aqa anjam nami degsib neŋgreŋyeb.

**28** Ariya bati qalub koboamqa e olo subq na tigelosiy niŋgi qa namoosiy Galili sawaq gilitqa niŋgi bunuqna e daurbosib dia e itbqab.”

**29** Onaqa Pita na minjej, “Aŋgro kalil naŋgi ino ñam ulontosib jaraiqab e segi ino ñam ulontqasai.”

**30** Onaqa Yesus na kamba Pita minjej, “E bole mermqai. Qolo qujai endeqa ni ijo ñam ultqam. Tuwe anjamoaiyeltosaisoqnimqa ni gisaŋjoqalubtosim marqam, ‘E Yesus qaliesai.’ ”

**31** Onaqa Pita a tulaŋ saidosiq minjej, “Sai. E ni ombla moiqa marimqa, uŋgum, e ino ñam ultqasai bole sai.” Onaqa Yesus aqa angro kalil naŋgi anjam qujai di minjoqneb.

### *Yesus a Getsemani nañu aguq di aqa Abu pailyej*

**32** Yesus aqa angro naŋgi koba na walwelosib nañu agu beiq di branteb. Nañu agu di aqa ñam Getsemani. Di brantosib Yesus na aqa angro naŋgi minjrej, “Niŋgi endi awesoqniy. E kiñala sasalosiq ijo Abu pailyosiy bqai.”

**33** Degsi minjrsiqa aqa angro qalub agi Pita na Jems na Jon na naŋgi segi joqsiqa pailyqajqa sasalej. Sasalosiqa pailyoqnsiqa a are tulanq gulbekobaiyej.

**34** Osiqa aqa angro qalub naŋgi di minjrej, “E are tulaŋ gulbekobaibqo. Gulbe dena e moiyepratonom. Deqa niŋgi e ombla endi sosimqa ŋam atoqniy.”

**35-36** Degsi minjrsiqa olo kiñala sasalosiqa mandamq di ŋam quosiqa endegsi pailyej, “O Aba. (Di Hibru anjam. Aqa damu, “O Abu.”) Gam bei soqnimqa ni na marimqa gulbe aqa batı bqo endi e bunbosim gilem. Ni kumbra kalil yqa kere. Deqa ni marimqa gulbe endi ijoq baiq. Gulbe endi ya uge uyo bul. Uŋgum, ni ijo areqalo dauryaim. Ni ino segi areqalo dauryosim ye.”

**37** Yesus a degsi Qotei pailyosiq olo tigelosiqa aqa angro naŋgo areq aisiq ŋam atej di naŋgi are gulbe na ŋereŋesonab unjrej. Deqa Yesus na Pita minjej, “O Saimon, ni ŋeiejunum e? Ni ŋam sokiñalayqa keresai e?”

**38** Niŋgi ŋereŋaib. Niŋgi ŋam sosib pailyoqniy. Yim gulbe bei nunjgoq bqas di gulbe dena niŋgi uneq waingwasai. Bole, nunjgo are miliq di niŋgi e daurbqajqa are unu. Ariya niŋgi segi gulbe di oqajqa singila saiqoji.”

**39-40** Osiqa Yesus a olo puluosi sasalosiq a nami pailyej qaji degsi olo pailyosiq bosiq aqa angro qalub naŋgi urŋamnırnaqa ŋereŋesonab unjrej. Unjırnaqa naŋgi Yesus anjam bei minjqa keresaiinjrej.

**41** Olo gilsiq Qotei pailyosiq bosiq aqa angro naŋgi itnjrsiq minjrej, “Niŋgi aqaratosib geregere ŋereŋejunub e? Uŋgum. Batı koboqo. Niŋgi uniy. E Tamo Angro osib une tamo naŋgo baŋq di atqajqa batı bqo.

**42** Niñgi tigelab gilqom. Tamo e osim une tamo nañgo banq di atqajqa agi brantqo.”

*Judas a Yesus osiq jeu tamo nañgo banq di atej*

**43** Onaqa Yesus aqa añgro 12 nañgi deqaji bei agi Judas a na tamo gargekoba nañgi sebru ti torom ti eleñonab joqsiqa Yesus aqa areq di branteb. Judagate nañgi ti dal anjam qalie tamo nañgi ti atra tamo kokba ti nañgi na nañgi qariñjnab Yesus ojqa beb.

**44** Judas a nami nañgi ti qairosib anjam gereiyosib a na endegsi minjrej, “E na tamo kundoqyqai agide. A ojsib geregere taqatosib osib giliy.”

**45** Onaqa Judas a Yesus aqa areq bosiq minjej, “O Tamo Koba.” Degsi minjsiq kundoqyej.

**46** Kundoqyonaqna tamo nañgi brantosib ban waiyosib Yesus ojeb.

**47** Onaqa Yesus aqa añgro bei jojom di tigelesoqnej qaji a na aqa sebru osiqa atra tamo gate aqa kañgal tamo gateq di qalqajqa sebru waiyej grotosiqa dabkala segi gentetej.

**48** Onaqa Yesus na tamo nañgi di minjrej, “E len ojo tamo unum deqa kiyo niñgi sebru ti torom ti eleñosib e ojqa bonub e?”

**49** E bati gaigai atra tal miliq di niñgi koba na sosimqa Qotei aqa anjam plaltoqnem. Bati deqa niñgi yala ban waiyosib e ojosai. Niñgi kumbra degyeb deqa Qotei aqa anjam neñgreñq di so qaji di aqa damu brantej.”

**50** Yesus a nañgi degsi minjrnaqa aqa añgro kalil nañgi a uratosib jaraiyeb.

*Añgro wala bei a yosi ulanjej*

**51** Bati deqa aŋgro wala bei a ɻeio gara segi na kabuosiq Yesus dauryej. Onaqa tamo naŋgi na aŋgro di ojeb.

**52** Ojnabqa a ɻeio gara segi naŋgo baŋq di uratosiqa yosi ulaŋej.

*Juda tamo kokba naŋgi Yesus aqa jejamuq di une qametqa marsib koroeb*

**53** Onaqa tamo naŋgi na Yesus osib atra tamo gate aqa talq osi gileb. Dia atra tamo kokba ti Juda gate naŋgi ti dal anjam qalie tamo naŋgi ti kalil koroesoqneb. Koroesonabqa tamo naŋgi na Yesus osi gilsib naŋgo ulatamuq di tigelteb.

**54** Naŋgi Yesus osi gileqnabqa Pita a kiñala isa isaq na Yesus dauryosiq uli uliosiq gilsiq torei atra tamo gate aqa tal meq di brantej. Brantosiqa naŋgi Yesus kiyeryib unqajqa deqa are qalsiq qaja tamo qudei naŋgi tal meq di ɻam tunguyosib aweson-abqa bosiq naŋgi koba na ɻam yoroqneb.

**55** Onaqa atra tamo kokba ti Juda gate naŋgi ti kalil koroesosibqa naŋgi Yesus aqa jejamuq di une qametqa are qalsib anjam ɻamoqneb. Di kiyaqa? Anjam dena naŋgi Yesus qalib moiqajqa deqa. Anjam ɻamonab ɻamonab ugeinjrej.

**56** Deqa naŋgi tamo gargekoba metnjreqnab boqnsib gisanj anjam Yesus aqa jejamuq di qameleñoqneb. Naŋgi anjam laŋa laŋa maroqneb. Naŋgo anjam di qujaiosai.

**57** Onaqa naŋgo ambleq dena tamo qudei naŋgi tigelosib Yesus aqa jejamu laŋa gisanjyosib mareb,

**58** “Tamo endi a endegsi marnaq iga quem, ‘E atra tal koba endi tamo na gereiyo qaji di

konjgrontosiyqa bati qalub qa olo atra tal bei tamo na gereiyosai qaji di tigeltqai.’ ”

<sup>59</sup> Ariya naŋgo anjam di dego qujaiosai. Naŋgi anjam laŋa laŋa maroqneb.

<sup>60</sup> Onaqa atra tamo gate a naŋgo anjam di quisiga a tigelosiqa Yesus aqa areq bosiq neneemyej, “Tamo naŋgi endi une gargekoba ino jejamuq di qameqnub. Di ni kamba anjam bei marqasai e?”

<sup>61</sup> Onaqa Yesus a torei mequmej. A anjam bei yala marosai.

Deqa atra tamo gate na olo nenemyej, “Ni Kris-tus e? Ni Qotei Goge Koba aqa Niri e? Ni e merbe.”

<sup>62</sup> Onaqa Yesus na minjej, “Od. Agi e segi. Ni que. E Tamo Ajgro. Bunuqna e lan qureq oqsiy Qotei singila koba ti unu qaji aqa baŋ woq di awesosiy olo laŋbiq na boqnit ningi e nubqab.”

<sup>63</sup> Onaqa atra tamo gate a Yesus aqa anjam di quisiga a tulanq minjiŋ oqetonaqa aqa segi gara jugo bumbranjyoсиа marej, “Aqa une agi a segi na babtqo iga quonum. Deqa iga kiyaqa tamo bei olo metonam bosim aqa une marqas?

<sup>64</sup> Aqa misiliŋ anjam ningi quonub. Deqa ningi kiyersib marqab?” Onaqa naŋgi kalil mareb, “A bole une ti. Deqa qalib moiym.”

<sup>65</sup> Naŋgi kalil degsib marnabqa naŋgo ambleq dena tamo qudei naŋgi tigelosiб Yesus misely-oqneb. Osib aqa ɿamdamu gara na qosetosib baŋ na qaloqnsib minjoqneb, “Ni Kristus amqa ni ubtosim mare, yai na ni lumqo?” Onaqa qaja tamo qudei naŋgi Yesus aqa areq boqnsib a ula poŋyoqneb.

*Pita a gisanjoqalubtosiq marej, “E Yesus qaliesai”*

<sup>66-67</sup> Ariya Pita a tal meq di awesosiq ḥam yoreqnaqa atra tamo gate aqa kaŋgal uŋa bei a bosiqa Pita unsiqa koqyosiq minjej, “Ni dego Yesus Nasaret qaji aqa aŋgro bei. Ni nami a dauryosim laqnem.”

<sup>68</sup> Onaqa Pita a tulan̄ saidosiq minjej, “Ni anjam merbonum di e qaliesai.” Degsi minjsiqa tigelosiq tal qala beiq gilsiq di soqnej.

<sup>69</sup> Sonaqa kaŋgal uŋa dena olo Pita unsiqa tamo naŋgi jojom di tigelesoqneb qaji naŋgi minrej, “Tamo di a dego Yesus aqa aŋgro bei.”

<sup>70</sup> Onaqa Pita a olo tulan̄ saidej.

Olo kiňala soboleiyonaq tamo qudei Pita aqa areq di tigelesoqneb qaji naŋgi Pita koqyosib minjeb, “Ni Galili qaji tamo. Deqa iga qalieonum, ni Yesus aqa aŋgro bei.”

<sup>71</sup> Onaqa Pita a olo tulan̄ siŋgila na saidosiq marej, “E tamo di qaliesai bole sai. E bole maronum. E gisanjot Qotei na e lubem.”

<sup>72</sup> A degsi marnaqa tuwe anjamej. Tuwe anjamonaqa Pita a qusiqa anjam nami Yesus na minjej qaji, “Tuwe anjamoaïyeltosaisoqnimqa ni gisanjoqalubtosim marqam, ‘E Yesus qaliesai,’ anjam deqa olo are qalsiqa poiyonaqa tulan̄ aka-mugetej.

## 15

*Juda tamo kokba naŋgi Yesus osib Pailat aqa baŋq di ateb*

<sup>1</sup> Onaqa nobqolo malu qameqnaq atra tamo kokba ti Juda gate naŋgi ti dal anjam qalie tamo

naŋgi ti kalil koroesosibqa Yesus qalib moiqajqa anjam keretoqneb. Anjam kereonaq naŋgi Yesus aqa banj tontetosib osi gilsib Rom naŋgo gate Pailat aqa banq di ateb.

<sup>2</sup> Onaqa Pailat na Yesus nenemyej, “Ni Juda naŋgo Mandor Koba e?” Onaqa Yesus na minjej, “Od. Anjam ni maronum di kere.”

<sup>3</sup> Onaqa atra tamo kokba naŋgi Yesus aqa anjam di quisib minjinj oqetnırnaqa aqa jejamuq di une gargekoba qametoqneb.

<sup>4</sup> Deqa Pailat na olo Yesus minjej, “Naŋgi une gargekoba ino jejamuq di qamelenejeqnub. Ni kamba anjam bei marqasai e?”

<sup>5</sup> Onaqa Yesus a torei mequmej. A anjam bei yala marosai. Deqa Pailat a tulan prugugetej.

*Pailat a marej, “Niŋgi Yesus a ɿamburbasq di qamiy”*

<sup>6</sup> Pailat aqa kumbra agiende. Wausau gaigai yori bati koba brantoqnimqa Juda tamo uŋgasari naŋgi tamo qujai aqa ñam maroqnibqa Pailat na tamo di tonto talq dena uratoqnsim enjroqnqas.

<sup>7</sup> Bati deqa tamo bei aqa ñam Barabas a tonto talq di soqnej. A nami tamo qudei joqsiqa Rom naŋgi ti qotsib tamo qudei ñumnab moreñeb. Deqa a ojsib tonto talq di waiyeb.

<sup>8</sup> Waiyonab sonaqa tamo uŋgasari kalil naŋgi Pailat aqa areq gilsibqa a naŋgo yori bati qa kumbra gaigai yoqnej qaji di olo yqajqa minjeb.

<sup>9</sup> Minjnabqa a na nenemnjrej, “E Juda naŋgo Mandor Koba uratosiy engwai e? Niŋgi na merbiy.”

**10** Pailat a naŋgi degsi nenemnjrej? Di kiyaqa? A qaliej, atra tamo kokba naŋgi Yesus qa ugeosib deqa a ojsib Pailat aqa baŋq di ateb.

**11** Onaqa atra tamo kokba naŋgi na tamo ungasari kalil nango areqalo tigeltnjreb. Tamo ungasari naŋgi Pailat minjibqa a na Barabas uratosim enjrsimqa olo Yesus qalim moiqajqa deqa nango areqalo tigeltnjreb.

**12** Onaqa Pailat na olo minjrej, “E ningi Barabas engwajqa merbonub deqa e Yesus kiyeryqai? Agi ningi a qa mareqnub, ‘A Juda naŋgo Mandor Koba.’”

**13** Onaqa naŋgi kalil murqumyosib minjeb, “Ni a ɣamburbasq di qame.”

**14** Onaqa minjrej, “Kiyaqa Yesus qalit moiqas? A une kiye yqo deqa a ɣamburbasq di qamqai?” Degsi minjrnaqa naŋgi olo tulan̄ murqumyoqnsib wainyoqnsib minjoqneb, “Ni a ɣamburbasq di qame.”

**15** Onaqa Pailat a nango are latetnjqra osiqa nango anjam di dauryosiqa Barabas tonto talq dena oqeç atsiqa naŋgi enjrej. Enjrsiqa olo Yesus osiq qaja tamo nango baŋq di atsiqa minjrej, “Ningi Yesus bu toqoŋ na kumbainyyi.” Degsi minjrnaqa naŋgi na Yesus osib kumbainyeb. Kumbainyosib koboonaqa Pailat na olo minjrej, “Ningi Yesus ɣamburbasq di qamqajqa osib giliy.”

### *Qaja tamo naŋgi Yesus misiliŋyoqneb*

**16-17** Pailat na qaja tamo naŋgi degsi minjrnaqa naŋgi Yesus baŋ ojsib Rom naŋgo tal kobaqujaq osi gileb. Osi gilsib qaja tamo kalil naŋgi met-njrnab bosib tal dia koroeb. Koroosib gara jugo

olekoba lent mendor kokba naŋgi gaigai jigeqnub deqaji bei osib Yesus jigeteb. Osib sil luwit osib lululosib sil dena mendor naŋgo gateatal bul gereiyosib aqa gateq di atetosib singila na teqiye.

**18** Osib gisaŋ na Yesus biŋyoqnsib minjoqneb, “O Juda naŋgo Mandor Koba, kaiye!”

**19** Degtisib Yesus minjoqnsib bu toqon na aqa gateq di qaloqnsib miselyoqnsib aqa areq di siŋga pulutoqneb.

**20** Naŋgi degsib Yesus misiliŋyosib koboonaqa gara lent di piqtetosib aqa segi gara olo jigetosib aqa qawarq di aqa segi ñamburbas atetosib a ban ojsib gaintqa sawaq osi gileb.

### *Naŋgi Yesus osib ñamburbasq di qameb*

**21** Naŋgi Yesus osi giloqnsibqa gamq di tamо bei walwelosiq Jerusalem aiyeqnaqa a turosib ojsib Yesus aqa qawarq dena ñamburbas yaiyosib tamо di yonabqa a kamba qoboiyosiqa gam na Yesus dauryosiq giloqnej. Tamо di aqa ñam Saimon. A Sairini qure qaji. A Aleksander Rufus wo naŋgo abu.

**22** Naŋgi Yesus osi gilsib sawa agu kiñala bei aqa ñam Golgota di branteb. Ñam di aqa damu, “Tamo gate tanu.”

**23** Di brantosib qaja tamо naŋgi na wain ti kial aqa ya isa koba de ti bulyosib Yesus anaiyonab uyo oneiyonaq ugeiyonaq uratej.

**24** Onaqa qaja tamо naŋgi na Yesus osib ñamburbasq di qameb. Qamsib Yesus aqa gara elenqa marsib gilteleñeb. Osib meniŋ silali alanjeb. Tamо yai aqa meniŋ na buŋnjrqaq di a na gara

oqas. Degtib marsib meniñ silali alanjosib gara eleñeb.

**25** Señ bati 9 onaqa nobqolo nañgi Yesus ñamburbasq di qameb.

**26** Qamsib ñamburbas mutu gogeq di anjam endegsib neñgreñyeb, “Tamo endi a Juda nañgo Mandor Koba.” Yesus a nami maroqnej, “E Juda nañgo Mandor Koba.” Yesus aqa une deqa osib anjam di neñgreñyeb.

**27** Bati deqa bajin tamo aiyel degó ñamburbasq di gaintrjsib ñumeb. Bei Yesus aqa bañ woq di qameb. Bei Yesus aqa bañ qonanq di qameb.

**28** Kumbra dena Qotei aqa anjam bei neñgreñq di so qaji di aqa damu brantej. Agi endegsib neñgreñyeb, “Tamo ungasari nañgi marqab, ‘Kris-tus a degó une tamo.’ ”

**29** Yesus a ñamburbas goge di sonaqa tamo ungasari nañgi aqa ulatamuq dena walwelosib gile beoqnsib a misiliyoqnsib gate gainyoqnsib minjoqneb, “Ni nami marem, ‘E atra tal koba kongrontosiyqa bati qalub qa olo tigeltqai.’ Ni nami degsi marem.

**30** Ino anjam di boleamqa ni ino segi jejamu aqaryaiyosim ñamburbas uratosim mandamq aiyé.”

**31** Atra tamo kokba ti dal anjam qalie tamo nañgi ti degó Yesus degsib misiliyoqneb. Osib segi segi maroqneb, “A na tamo ungasari gargekoba nañgi aqaryainjroqnej. Ariya a na aqa segi jejamu aqaryaiyqa keresai.

**32** A maroqnej, ‘E segi Kristus. E Israel nañgo Mandor Koba.’ Aqa anjam di boleamqa a

ηamburbas uratosim mandamq aiyimqa iga unsim marqom, ‘Bole.’” Onaqa bajin tamo aiyel Yesus ombla gaintnjreb qaji naŋgi dego Yesus degsib misiliŋ anjam minjogneb.

### *Yesus a moiyej*

<sup>33</sup> Qanam jige seŋ batı 12 onaqa sawa kalil tulan̄ ambruosi sonaq gilsiq seŋ batı 3 onaq bilaqtej.

<sup>34</sup> Onaqa Yesus a tulan̄ leleŋosiqa marej, “Eloi, Eloi, lama sabaktani?” Di Hibru anjam. Anjam di aqa damu, “O ijo Qotei. O ijo Qotei. Ni kiyaqa e qoreibonum?”

<sup>35</sup> Onaqa tamo qudei Yesus aqa areq di tigelesoqneb qaji naŋgi aqa anjam di quſib mareb, “Ningi quiy. A Elaija meteqnu.”

<sup>36</sup> Degtib marnabqa tamo bei a urur ti gilsiq gara ñeŋgi bei osiq wain isa kobaq di tuqtosiqa soruq di qosisiqa osi bosiq Yesus anaiyqajqa soqtosiqa aqa medabuq di atej. Osiqa marej, “Iga mati tarinosim koqyesqom. Elaija a bosim Yesus ñamburbasq dena osim mandamq atqas kiyo?”

<sup>37</sup> Onaqa Yesus a olo tulan̄ leleŋosiqa mondor titosiq aqa ñambile uratosiq moiyej.

<sup>38</sup> Bati qujai deqa gara kobaquja atra tal miliqiq di gainjesoqnej qaji a goqe na braŋosiq aisiq poaiyelej.

<sup>39</sup> Yesus a degsi mondor titosiq moiyej deqa qaja tamo naŋgo gate Yesus aqa areq di tigelesoqnej qaji a unsiqa marej, “Bole. Tamo endi a Qotei aqa Niri.”

<sup>40</sup> Uŋgasari qudei naŋgi isaq di tigelesosib Yesus koqyoqneb. Bei Maria Makdala qure qaji. Maria

bei agi Jems yala Joses wo nañgo ai. Uña bei Salome.

<sup>41</sup> Yesus a nami Galili sawaq di sonaqa ungasari nañgi dena a dauryosib laqnsib kañgalyoqneb. Bunuqna Yesus a Galili sawa uratosiq a na nañgi qalub ungasari qudei ti joqsiqa koba na Jerusalem beleñeb.

### *Josep a Yesus aqa jejamu osiq subq atej*

<sup>42</sup> Juda nañgo yori bati brantqa laqnej deqa yori bati aqa ingi ingi kalil gereiyosib atnab soqnej.

<sup>43</sup> Onaqa bilaqtonaqa tamo bei aqa ñam Josep a Yesus aqa jejamu osim subq atqa marsiqa Pailat nenemyqa gilej. Josep a Juda nañgo gate bei. A Arimatea qure qaji. Aqa kumbra tulan boledamu. Deqa tamo ungasari kalil nañgi a qa maroqneb, “A tamo bolequja.” A endegsi are qaloqnej, “Bunuqna Qotei a bosim gago Mandor Koba sosim iga taqatgwas.” A degsi are qaloqnsiq Qotei qa tarinjoqnsiq soqnej. A Pailat aqa talq gilsipa aqa areq di tigelej. A ulaosai. Osiqa Pailat nenemyej, “Ni e odbimqa e Yesus aqa jejamu osiy subq atqa kere e?”

<sup>44</sup> Onaqa Pailat a tulan prugugetosiq marej, “Yesus a urur moiqa e?” Osiqa qaja tamo nañgo gate a metonaq bonaq nenemyej, “Yesus a bole moiqa e?”

<sup>45</sup> Onaqa minjej, “Od, a moiqa.” Onaqa Pailat a anjam di quisipa Josep odyosiq minjej, “Di kere. Ni Yesus aqa jejamu am. Osim subq ate.”

<sup>46</sup> Onaqa Josep a gilsipa gara qat awaiyosiqa Yesus aqa jejamu ñamburbasq dena osiqa gara qat na dalaosiq osi gilej. Osi gilsipa sub bei nami

menij miliq di gereiyeb qaji dia atsiqa menij kobaquja belbeltoсиq dena sub me getentej.

<sup>47</sup> Josep na Yesus subq ateqnaqa Maria Makdala qure qaji wo Maria bei agi Joses aqa ai wo bosib koqyesoqneb.

## 16

### *Yesus a olo subq na tigelej*

<sup>1</sup> Onaqa yori bati koboonaqa Salome na Maria Makdala qure qaji na Jems aqa ai Maria na nangi qalub һam so aqa ya quleq tulaң boledamu awaiyeb. һam so aqa ya di Yesus aqa jejamuq di liyqajqa deqa awaiyeb.

<sup>2-3</sup> Osib nobqolo ambru nangi tigelosib Yesus aqa jejamuq di liyqajqa deqa subq giloqnsib gamq di segi segi maroqneb, “Yai na menij kobaquja sub me getentejunu qaji di beltosim taqal atetg-was?”

<sup>4</sup> Degtisib maroqnsib gilsib һam ateb di menij kobaquja waqosiq taqal di sonaq uneb. Menij di tulaң kobaquja.

<sup>5</sup> Onaqa naنجи sub miliqqaisib aنجro wala bei banj woq di awesonaq unsib ulaugeteb. Aنجro wala di aqa gara tulaң qat.

<sup>6</sup> Onaqa aنجro wala na minjrej, “Niنجi ulaaib. E qalie, niنجi Nasaret tamo Yesus һamburbasq di qameb qaji a qa һameqnub. A endi sosai. A subq na tigelqo. Niنجi bosib sub miligi uniy. A һeioteb qaji lume agi unu.

<sup>7</sup> Niنجi unsibqa olo puluosib aisib Yesus aqa aنجro qudei naنجи Pita ombla endegsib minjriy, ‘Yesus a subq na tigelqo. Tigelosiq niنجи qa

namoosiq Galili sawaq gilqo. Agi a nami niŋgi endegsi merngej, “E niŋgi qa namoosiy Galili sawaq gilqai.” Deqa niŋgi dego Galili sawaq gilsib dia a itqab.”

<sup>8</sup> Onaqa naŋgi qalub tulaŋ ulaugetosib are toŋtoŋnırnaqa sub uratosib olo puluosib aiyeb. Aiyoqnsibqa gamq di tamo uŋgasari naŋgi turoqnsib anjam bei minjrosaioqneb. Naŋgi laŋa aiyogneb. Di kiyaqa? Naŋgi tulaŋ ulaugeteb deqa.

### *Maria Makdala qure qaji a Yesus unej*

<sup>9</sup> Yori bati koboonaqa nobqolo ambru Yesus a subq na tigelosiqa mati Maria Makdala qure qaji aqaq di brantonaq unej. Maria agi nami Yesus na mondor uge 7 naŋgi aqaq dena winjretek qaji.

<sup>10-11</sup> A Yesus unsiqa olo puluosi gilsiq Yesus aqa aŋgro qudei nami Yesus dauryosib laqneb qaji naŋgi are ugeinjrnaqa akameqnabqa itnjriſiqa minjrej, “E Yesus unonum. A ɣambile unu.” Onaqa naŋgi Maria aqa anjam di qunab ugeinjrej. Naŋgi aqa anjam deqa poinjrosai.

### *Yesus aqa aŋgro aiyel naŋgi gamq di Yesus uneb*

<sup>12</sup> Olo bati bei Yesus aqa aŋgro aiyel naŋgi nañu gam bei dauryosib gileqnabqa Yesus aqa jejamu bulyosiqa naŋgoq di brantonaq uneb.

<sup>13</sup> Unsibqa naŋgi olo puluosib aisib Yesus aqa aŋgro qudei naŋgi minjreb, “Yesus a gagoq di brantqoqa iga unonum.” Degtib minjrnabqa naŋgi dego qunab ugeinjrej. Naŋgi anjam deqa poinjrosai.

### *Yesus na aqa aŋgro naŋgi wau enjrej*

**14** Olo bati bei Yesus aqa angro 11 naŋgi tal miligiq di awoosib iŋgi uyeqnabqa Yesus a naŋgoq di brantej. A nami subq na tigelonaqa tamo qudei na unsib naŋgi sainjrnab qunab ugeinjrej. Naŋgo are getenŋjresoqnej. Deqa Yesus a segi naŋgoq di brantosiqa naŋgi n̄irinjtnrej.

**15** Osiga minjrej, “Niŋgi tigelosib sawa sawa kalil keretoqnsib tamo uŋgasari kalil naŋgi ijo anjam bole minjre minjre laqniy.

**16** Tamo uŋgasari naŋgi e qa naŋgo areqalo singilatosib yanso oqab di Qotei na naŋgi eleŋqas. Ariya tamo uŋgasari naŋgi e qa naŋgo areqalo singilatqasai di Qotei na naŋgi eleŋqasai. A na naŋgo une qa peginjrsim awai uge enjrqas.

**17** Tamo uŋgasari e qa naŋgo areqalo singilatqab qaji naŋgi maŋwa gargekoba endeqaji babtoqnqab. Naŋgi ijo ŋam na mondor uge uge winjroqnqab. Qotei na naŋgo meŋ bulyetnjroqnimqa naŋgi qure utru bei bei naŋgo anjam bunuj maroqnqab.

**18** Naŋgi baŋ waiyosib amal uge ojoqnqab. Naŋgi ya isa koba qaja ti di uyoqnib dena moreŋqasai. Naŋgi ma tamo naŋgo gateq di baŋ atoqnib naŋgi olo boleoqnqab.”

### *Yesus a laŋ qureq oqej*

**19** Tamo Koba Yesus na aqa angro naŋgi degsi minjrnaqa Qotei a Yesus laŋ qureq osi oqsiqa aqa baŋ woq di awotej.

**20** Onaqa aqa angro naŋgi jaraiyosib sawa sawa kalil keretoqnsib Qotei aqa anjam palontoqneb. Palonteqnabqa Tamo Koba a naŋgi koba na wauoqnsiqa maŋwa gargekoba babtoqnsiqa dena naŋgo anjam singilatoqnej.

**Yesus Aqa Anjam Bole 2000  
The New Testament in the Anjam language of Papua  
New Guinea, 2000 edition  
Nupela Testamen long tokples Anjam long Niugini,  
2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

6bd977a8-0139-583b-a367-c04faf6223cc